

Yiviru

Pikariyikwia' Yiviruyaraavinesi.

Gamire Gawaalivaangei dakevi Gotiyai nedake'nesi.

1 ¹Kigaakuna kwala naangegaa' Gotiyai gaminyi wi'nawijiwaakyaraavi simunya pininna piri' widina, pininna piri' widina. Yi sara kujaa' sahvara nemire Ne sinnawinyaraavi simunya nabinabinya pibura wijaasara kwalaalyare. ²Kiri' nabaai dahaa' aayagasa Gotiyai yagaala nedake' gamire Gawaalivaangei nedakesi. Sahwari Ganimaangere yuya maarya'neri Gotiyai mena dahilakakelyi. Nabaai Gawaalivaanga sahwari Kwaaka dasi sigunya kirisii Gotiyai yavikaryaakengi. ³Gawaalivaangei sahwai Gotiyare byaanna diraginya' livamwaja naangelyi. Yi neminyi Baaka naanga nemwadadelyi. Sahwai Gotiyari avaaaina nebulya'nanyalyi. Gamire yagaala diraginya kininnake' dada yuyangi diraginya yivaimwada yuya sarengi limwaga'delyi. Kayaa'nanyangine tivikisa duimwagasita ya'ne' sahwai wawinya yunebanna yi'mwannaka Kingiya Naangei munya ke'beva mwaalikere aangasimagi diraginnakeba mwaala'.

Gotiyare Gawaalivaangei ejelijara mamaayaraavi wavilavikerinesi.

⁴Gawaalivaangei Ganimaangeri yaya tewaanya nawi'nyaange' mena maarake' yi mamaayaraavire yayavi wavilavakabaabi' yi sasare sahirivi gami sai mamaayaraavina naanga nebulya'na yima'nakelyi. Yi sahvara sari kwaakewi wila'nakasalyi. ⁵Sare' darevinyi. Sinnawi sagaal' Gotiyai mamaayarajiya aane pwai kwari dara muja'

“Gimi niminyi nyibwaaalivaangeiginyira.

Dahaa' gimaamaangeinyi gimwaaahiweiginyi.”

Kiri' Gawaalivaangeri sara wida'. Yi sahwai mamaayarina ayahi muja'

“Gaminyi ganimaangeinyi yima'nideinyi.

Niminyi nyibwaaalivaangei yima'nadelyi.”

⁶Kiri' Kwaakevaki mwaalyaraayawinna sahwai gamire aaya mudikaimiraayari makwalaabakegaa' sarei da' “Mamaaya yuya

Gotiyainyirera sahwari yilaaya nayaa maripika!” 7Nabaai sahwai
mamaayaraavina dara wida'

“Gamire mamaayaraavi yihusa'bisaraavi wimwaaihadere.
Gamire widaayadivisaraavi ditaalisa'bisaraavi wimwaaihadere.”

8Kiri' Gawaalivaangerina dara wida'

“Gotiyaigi, yuyagaa' yuyagaa'ne kinginamwaaalyisavi
dimaremwaaidiginyi.

Gimire a'mweraavi kingiyisarisi yida'nanyabwina
yawibwaramaremwaaidinyaiginyi.

9 Giminyi yida'maraanga sabwina tewaanya givu'nadeiginyi.

Kiwinyangi galazekivalyabwina similika gwimwaalikeiginyi.

Midinaginyavidaa'nyai Gotiyainyi gimire Gotiyainyi yileweliananya'
githingeiginyi.

Yi welivananya daza' giminyi yilaaya gihalakeiginyi.

Ja'mwera yivaniginyabaabi' yilaaya yivanigatara mi'.”

10 Nabaai Gawaalivaangerina dara wida'

“Naangeigi sinnawi Kwaaka datha' wakyeginyi.

Nabaai sigunya' ginnya asiraalyi yavikaryeginyi.

11 Yuyawaai yinahu kayaaka yinyina yadewaalyi.

Kiri' gimi aawa. Yuyagaa' mwaaidinyaiginyi.

Yuyawaalyi yuya piniji aya yima'nadengi.

Baazi'ma'nya piri' aya yima'nadevaabisangi.

12 Yi yivita aya' gi'mwagakina yadevaabi'

Gimi yuya sangi dihi'mwagakideiginyi.

A'mwei baazi'ma'nya yadaihamaa'na yadevaabi'

Gimi yuya sangi yadaihamaata jithengi.

Kiri' gimi yuna sana dimwaaideiginyi.

Gimire kwaramegasa mi'na yiwawade mi'.”

13 Pigaa' kigaa' Gotiyai mamaaya darajiya bewari widakelaka! Aawa.

Gawaalivaangerina dara dini'

“Gimi nimore aangasiri diraginyaba dimwaala!

Giminyi dalaangewi wila'narya'negaa'na yikamaangeraavi
gwakidehaa'nanyi.”

14 Aawa. Mamaayara yi sahwara kuryarera. Yi kurya sahwara

Gotiyari widaayadivisare. Gotiyai a'mwera gamire yuna

padaihasamaarya'neraavina gaimwagya'ne mamaayaraavi maryaasadere.

Gotiyai nevadaihasamaata naanga nebulyasi.

2 ¹Sarevidaa'nyai yagaala nemi mena wi'no' nemi nayaa kuna
limwagaraana! Nemire simunyangi diraginna yawi'daa
midinaana! Yagaala daza'na diraginna mi nyaadika! Yi sara yawaaji
yinahu nyagalya'mavaadika! ²Sare' darevinyi. Sinnawi Gotiyai

mamaayaraavire maangikidaa'nyi Juyainaavire Ne sinnawinyaraavine kiwinya' jaakelyi. Yi yagaala daza' nebulya'nanya' diraginna daavikesi. Yi yagaala savine yiwetawakya gazasavinaji yagaala savi galazekivala gazasavinaji tivikita kayaa'nanya' maryaasa'nanyi. Kumire kayaa'nanya yadivita sabwina yinigeva tivikita yida'maraange' wari!. Yi mamaayaraavire maangikidaa'nyanna tivikita sara maryaasa'na ³dahaa' nevadaihasamaata naanga nebulya'nanyavine' navika mwalaaja' yi nemi likaanya wawaaji kayaa'nanaangevi gatha'dara wavilavaadevaka! Yuna wana aawa nebulya'na. Sinnawinyaraavine tivikita sa' maalikesi. Dahaa' neminyine' tivikita naangesi. Yi mamaayara nedetara mi!. Sinnawi Naangei gami sai yagaala daza' mena widakesi. Nabaai a'mwera gaminyi kadika wi'neva sahvara neminyi dara nejiwaake' "Yagaala daza' yuna wana naanga nebulya'nanyasi." ⁴Sara nedadaapi Gotiyai sahwaraji ye'mwannajalikuluraka!. Yi sahwai yijiwaainyaji atika maru'nasaji diraginya dala pininna pininnanyaji yada ye'mwannajalikulurakina. Nabaai sahwai gannya simunyavi nayaa yawi'da Kurya Tewaanyare sihumale a'mweraavina yanga wijaavada ye'mwannajalikulurakina. Yi sarengi ye'mwannajalikulurakelyi.

Jizaazai padaihasamaasabwinevi makabakerinesi.

⁵Sare' darevinyi. Divi yima'nade pibwina divanigo'nanyi. Gawaalivaangei maremwaaidelyi. Gotiyai mamaayaraavi dazahirivi maremwaalya'neraavi dahilakakera mi!. ⁶Aawa. Gotiyare bukuyavi pikarya piri'vi a'mwe pwai nayaa dara jalikulurakin!

"A'mwe kwara bewaraavaka!

Gotiyaigi sahwaraavina yawi'dinyaigi daa!

A'mweraavine kaimiraayai bewalaka!

Yi gimi nayaa be'na maremwaaidinyaiginaka!

⁷Yune tusagaa'nana gimi wakaginyalyi.

Sahwai mamaayaraavi dalaangewi wila'nari!.

Byaannyavi sahwarine yaya' munyaba makilagi.

Yi sahwari yaya naange' wijaavaginyalyi.

⁸Sahware siviliyiraari kwaaka dalaangewi yuya wakagi.

Sahwai yuya sa diraginna maremwaalikelyi."

Sara dinike' Gotiyai yuya a'mwe kwaraavi kwaaka dalaangewi wakakengi. Yi sarevidaa'nyi aane piri' kiri' kuminyi dalaangewi mula'narya!. Kiri' dahaa' kuminyi dalaangewi yuya warike nemi mwanganyinanyi. ⁹Kiri' nemi a'mwe pwai Jizaazari yawirangamanigolyi. Kigaa' maalikegaa' a'mwe sahwari mamaayaraavina maalikibawei wimwaihakelyi. Yi a'mweraavina gaimwagya'nei balya'ne'na Gotiyare yanga gaimwange' marima'naaba!. Sahwai daanga dazahiri' maa'da yi bala!. Sarevidaa'nyi yi Gotiyai sahwarine yaya' munyaba makida byaanna diraginya' wijaavakelyi.

¹⁰Sare' darevinyi. Yuya Gotiyarinengira. Sarei yuya yavikaryaka yuyangina diraginya kuna wijaavadelyi. Yi sahwai yawiraka “A'mwera nimire kaimiraayara yima'nipika!” gannya kaimiraaya kwalaalyaraavina byaanna diraginyavi makwia'neri Jizaazari daange' wijaava'. Yi daanga dazavi Jizaazai sahwaraavi yiniga wi'na padaihasamaarya'nei sahwai a'mwe naanga yune nebulya'nanyai yima'na'. Daanga wijaaya sasare sabwi Gotiyai yake' yi sa' yida'nanyasi. ¹¹Sare' darevinyi. A'mwe dazai a'mwe yuyara Gotiyarera tewaanya nawi'nya yima'nya'neraavina ya'nelyi yi a'mwe dazaraji yuyaraavi kuvinimaangei yune gave pwainanyi. Sarevidaa'nyi Gawaalivaangei sahwaraavina dara widivani' “Nya'mweihilyira.” Saraavina sasara ja'na gaminyi wagila muvwa'nyakelyi. ¹²Sai Gotiyari wida'. Dara dini'

“Giminyina nya'mweraavi 'Sasarelyira. Nawi'nyaangelyira,'
widideinyi.

Giminne yaya' makilya'ne' kusilaanyaviyaraayaba daata dideinyi.”
¹³Nabaai ayahi dara dinikesi.

Nimi saraji sahwari diraginna limwagaridelyi.
Nabaai dara dinikesi.

Yithaa, nimiji kaimiraaya Gotiyai nyijaavakera
nye'mwannemwaaahasare.

¹⁴Kaimiraaya dazara a'mwera mwaaiha'. Yi tawanakera yaka miwi'nakere. Sarevi yi Jizaazai kwalyi sahwaraabi' avaina a'mwei yima'nakelyi. Yi sarei balakelyi. Nabaai “Balya dazavi balyaburine diraginya' kininnakeri kayaa'nanyari kayaaka yigalakima!” daka a'mwei yima'nakelyi. Yi balyaburine diraginya' kininnakei yi sai Yuyaraavi Kotiya Maryadei, Saataani. ¹⁵Nabaai dare'nesi. A'mweraji a'mweji balya'na lika yadivisarera. Nabaai yuyagaa' Kwaakevaki sahwara mwaaidapiyaraavi lika daza' yaasiwa'wawinyavi galyiralimwaga'desi. Sahwai balaka daza' yi sahwaraavi kalavuzi sahirivi wo'dalamarasita ya'nelyi. ¹⁶Naanga nebulya'nanyasi. Sahwai mamaayaraavi gaimwanga ya'nei sara myakelyi. Aawa. Sahwai yaka sa' yi Eviraamimire yisavaakiyaraavi gaimwagya'ne' yakelyi. ¹⁷Sarevidaa'nyi yuyangi gamire gya'mwerabi' sai nayaa avaina nebulya'na yima'nya'ne' tivikita warakesi. Yi daresi. “Yi a'mweraavi Gotiyareraavi kale gaimwanga wia'neinyi yima'nima! Yi Gotiyarinengi gamire wawinya' nayaa limwaga'di Gotiyarina Mubithika Yira'de Naangeinyi yiniga wi'na mwaalima! Sareinyi a'mweraavi wagilyangi marasita'neinyi sinna tika widowabwina mubinima!” daka gya'mwerabi' nayaa avaina nebulya'na yima'nakelyi. Gotiyari wijaavinya' yiniga wi'na yannelyi. ¹⁸Sare' darevinyi. Sarei taange' yuya taanga gaminyi yima'naka sangi maarakelyi. Nabaai Kamaalyai yijiwaala yaamiji wiaka kiri' diraginna daavakelyi. Yi sarei a'mweraavi yima'nakengina sara

yibwakinakevidaa'nyi sahwarraavi taanginyabwi kima'noji sahwarraavi gaimwange' yi yuyagaa' sarei yiniga wi'na yadelyi.

Jizaazai Ne Mozizari wavilavike'nesi.

3 ¹Nya'mweihi Gotiyare tewaanyaihi Gotiyai Sigunyavi mwaalikei kwaihiriji jaka yihizivwaramaakeihi, sarevidaa'nyi Jizaazarina simunya nayaa dara divada'galayawirila! Sahwai neminyina Gotiyai Widasaabakelyi (Apozeliyalyi). Nabaai sahwai Gotiyarina Mubithika Yira'de Naangeri nemi diraginna limwamanigolyi. Yi gaminne yaya' jalikurakivanigolyi. ²Sahwari wawinya dazavina Gotiyai dahilakakei yi sarei Gotiyari naanga nebulya'na limwaga'delyi. Sinnawi Ne Mozizai Gotiyare a'mweraavi (Gotiyare angeviyaraavi) yaakevina Gotiyari limwagyaakabaaibi' sara yakelyi. ³Sarerina da'darevinyi. Jizaazarina Gotiyai yawi'daasi sai angevi madei mwaali'. Ne Mozizai angeviyai mwaala'. A'mwei ange' madina yaderine yaya naange' sa' yune angevine yaya naangevi wavila'devaabi' Jizaazare yaya byaannaka naange' yiniga wi'na maarakere yaya sa' Mozizare yaya naangevi angeviyarinevi wavila'delyi. ⁴Sare' darevinyi. Anga gazasa' yune a'mwerana madivisasi. Kiri' yuyangiji yuyaraaviji yavikaryaakei sai Gotiyalyi. Sai Mozizariiji Gotiyare pwaraaviji wimwaaihadelyi. ⁵Mozizarine' daresi. Sahwai Gotiyare yuyaraavi (Gotiyare angeviyaraavi) wigaimwagya'nei Gotiyari widayaakei diraginna limwagyaakelyi. Sara yada Gotiyai divi Gawaalivaangerina neja'ne' jalikurakyaake'nanyi. ⁶Kiri' Kiraazitiyarine' daresi. Sahwai Gotiyare Gawaalivaangei mwaaida Gotiyare a'mweraavi (Gotiyare angeviyaraavi) munyaba mwaalya'nei sahwarraavi maremwaaalikelyi. Yi nabaai yuyagaa' nemi Kiraazitiyari kuna diraginna limwagaaza' yi nemi yilaayasi yadaa Naangerina kuna diraginna yemwalaaja' nemi kwainaji Gotiyareina (Gotiyare anga saviyaina) mwaaihoina.

⁷Sarevidaa'nyi Kurya Tewaanyai dake' dara dinikabaaibisasi.

Dahaa' Gotiyare maangwiraayavi kadika wi'nipija'

⁸Sarimire simunya' kaanya wana diraginna marihiremwaabina!

Ne sinnawinyara galazekivala nyaatabaabi' mipinera!

Sahwara kayaa'na yaasagaa' a'mwamaayimagi mwaaleva

Gotiyainyi yaamiji diraginna yijiwaala nyadivi'

“Navika mwaaladei dingaka!” deva nyaasare.

⁹Sarimire siryakwalaangera nyawiranganya'nera yijiwaala nyaasare.

Kwarame potiyangi nimi yaangi wanganyaata kiri'

Niminyi kayaa'na yaamiji yijiwaala nyaasare.

¹⁰Sarevidaa'nyi davaakina similike' nyulyaake'na

Yi nemi diraginna dara jaainyi

“Yuyagaa' kumire simunyavi nyagalya'ma'divisare.

Nimire saburi kaanya myamarya'nera manyawiryadivisare.”

- 11 Sare'na niminyi similika nyuidaa'nyiyavi
 Yagaala diraginya' dara jalikurakyya
 “Kwaaka kave kwaamu' kujaaviwidikeba
 Sahwara kusawi bwibi'dera mika!”
 “Sa' wana naanga nebulya'nanyasi.”

12 Nya'mweihi, sarevidaa'nyi mala nayaa jiwannyila! Sariminyidaa'nya pwai kwai Gotiya gaalyaburi aaya kaavilyari yagalya'masa'na gamire simunyavi Kiraazitiyari diraginna malimwagarya kayaa'nanyabwi nularadika! 13 Awa. Yirika gazagaasagaa', Gotiyai kuna divanikegaa' “Dahaaka!” sa' kuna warikegaa' sarimi sirya'mweraavire simunyangi dihaa'bwata jila! Yi kwaasiya wagilyabwi sariminyidaa'nya pwari kwari kwaasi nudathika! Yoji gamire simunyavi diraginna narihiremwaahadika! 14 Sare' drevinyi. Sinnawi nemi Kiraazitiyari diraginna limwadaa diraginyaina daavina yadaa yune nemi balaajahaa'na kuna diraginna limwagaragwawaaja' yi nemi Kiraazitiyalyi ye'mwannamwaaihoina yima'naadeinera. 15 Diraginna limwagaragwokwia'neina Gotiyare yagaala dinika sa' yawiramaraade'nanyi. Yi dara dini'

“Dahaa' Gotiyare maangwiraaya' kadika wi'nipija'
 Sarimire simunya' kaanya wana diraginna marihiremwaabina!
 Ne sinnawinyara galazekivala nyaatabaai' mipinera!
 ‘Navika mwaaladei dingaka!’ deva nyaasare.”

16 Sare' drevinyi. Sinnawi Gotiyare maangiki kadika wi'nyaata kwara kiri' sahwara kayaa'na yina yadivi' gamire yagaalya' galazekivaina yaasara aaiharavaavaka? Ne Mozizai makwiaakera Yizireliyara Yizipi saba yagalya'mayaata yuyara sasare dazabwi yaasara daaka! 17 Kwarama potiyangi (40) Gotiyai similike' aaiharavaavina wilyaakalaka? A'mwe kayaa'nanyabwi yadivisa'na sahwara baidivi' kumire kilaakeji' a'mwamaayimagi bwalaraawina yaakera daaka! Gotiyai sahwaravina sinna tike' wilyaakere. 18 Gotiyai yagaala diraginya' naanga nebulya'na dara jalikurakyya' “Kwaaka nemi kwaamu' kujaaviwidikeba sahwara kusawi bwibi'dera mika!” Wana naanga nebulya'nanya' sara dakyaake' aaiharavaavina jaakava'? Da a'mwe dazara gamire yagaalya' galazekivala yaasara daaka! 19 Sarevidaa'nyi nemi dara yawirangamanigo. Kumi diraginna malimwagaryadivisa'nanyi. “Aala!” dadivisa'nanyi. Yi dazahirisavina sahwara Gotiyare kwaamusabanna bwilyaatara mi'.

Gotiyare a'mweinaavina kwaamusabanna mwaalya'nebwinesii.

4 1 Sarevidaa'nyi nayaa jawirila! Gotiyare yune naanga nebulya'na yagaala dakinike' neminyine' kuna wari'. Yi sai dara divani' “Sariminiku' nimire kwaamusaba wibineihilyi.” Sare' kiri' nemi lika

dara yaana! O, Gotiyai tinna nengada neminyidaa'nya kwai pwarina dara najidavadika! “Sahwai menyawi yalawakada dazavi yi yiwina yivanikelyi.” ²Sare' darevinyi. Sinnawi a'mwamaayaba mwalyaasara Gotiyare yagaala kwaamusa'ne' wi'nyaatabaabi' nemi yagaala tewaanya sa' kadika wi'noinera. Kiri' nabaai sahwaru kadika yaasiwa' wi'nyina yeva diraginna malimwagi yaa'. Yagaala daza' wi'neva diraginna mye'mwannalimwagaryaasare. Sarevi yagaala daza' sahwaru kadika wi'nesa', sa' yi sahwaruavi gaimwanga mwiaa'. ³Sare' darevinyi. Nemi diraginna limwaga'manigoina kave kwaamu' mwaalya'ne dazaba wilaadeine. Yi sinnawi Gotiyai malimwagyadivisaraavina dara dinikesi.

Sare'na niminyi similika nyuida'nyiyavi
 Yagaala diraginya' dara jalikurakya
 “Kwaaka kave kwaamu' kujaaviwidikeba
 Sahwaru kusawi bwibi'dera mika!”
 “Sa' wana naanga nebulya'nanyasi.”

Sahwai sara daka kiri' nabaai sinnawi Gotiyai Kwaake' mena wakyaakegaa' kwaamusabwine' mena dakinikesi. Sagaa' kwaamusavi mwaaida neminyina yemwaaideleyi. ⁴Sare' darevinyi. Gotiyare Bukuyavi yirika asi ata puridaa'nyi daryaalyarikina dara dini! “Gotiyai gamire wawinya yuya sa mena yaka yirika asi ata puridaa'nyi daryaalyariki kave kwaamu' mwaala.” ⁵Sinnawi mi'na yihithiwevi (3:11,4:3) Gotiyai Yizireliyaraavina dara wida'

“Kwaaka kave kwaamu' kujaaviwidikeba
 Sahwaru kusawi bwibi'dera mika!”

⁶Yagaala daza' “Pwara gamire kave kwaamu' mwaalyaba wibi'dere,” kuna wari'. Nabaai sinnawi yagaala tewaanya' kwaamusaburine' wi'neta sahwaru yagaala sa' galazekivala yesa'na kusawi wiletagaa' mi'. ⁷Sarevidaa'nyi yi Gotiyai yirika piri' ayahi dahilaka!. Sahwai yaya da' yirika dazari'na “Dahaaka.” Sinnawinyara galazekivala kye' kwarame kwalaalya mena kabwawa' Gotiyai Devitimire maangiki yagaalya' da'. Mi'na yihithiwe' dara dini'

“Dahaa' Gotiyare maangwiraaya' kadika wi'nipija'

Sarimire simunya' kaanya wana diraginna marihiremwaabina!”

⁸Sare' darevinyi. Sinnawi Jozuwaa' saraavi kwaamu' mwaalyabwi wijaavaji kwaji sagaa'daa'nyi yirika piri'na Gotiyai muji kyadika!

⁹Sarevidaa'nyi dara yawi'manigo. Sinnawi Gotiyai yuya wakaka yirika ata puridaa'nyi daryaalyariki kwaamu' mwalyaakabaabi' Gotiyare a'mweraavine kave kwaamu' mwaalya' kuna wari'. ¹⁰Sare' darevinyi. A'mwei Gotiyare kave kwaamu' mwaalyaburi wilajai sai gannya wawinya' mena yi'mwannoji kwaamu' mwaaladelyi. Sinnawi Gotiyai yune gannya wawinya' mena yi'mwannaka kave kwaamu' mwalyaakabaabi' a'mwe sai kwaamu' mwaaladelyi.

¹¹ Sarevidaa'nyi kwaamu' mwaalya dazaba kusawi wilya'nevi nemi nayaa diraginna yuyanna yawirayaana! Yi kigaa' sahwara ke'ba'nanya'na yetabaabi' a'mwe pwai kwai galazekivala ya'ne sabwi midida yi sai kayaa'nanyaburi walaraawoji yi yiwina nyadika! ¹² Sare' darevinyi. Gotiyare yagaalya' nemirebwina biranemaaranne'nanyi. Yagaala sa' gaalyabwi kininnakesi. Yi sa' wawinya diraginya yiniga wi'na yadesi. Sa' gurimaanga di'bwa'nike' yi kwaari'masiraminya gurimaanga pimaginyaala gazavizavi wawilavikesi. Yi sa' a'mweraavi dabira'nigwida yune kuta ke'mwewi nebulya'na widesi. Sa' tinnyawi wilyi'ma'da gaalyaviji kuryariji yi sawaari midaaihi'desi. Yi sa' dahaalyangiji yagidilyangiji tinnyaba wilyi'ma'da yuya sangi dabira'desi. Yi sa' yuya simunya sangiji nemi ya'nengiji yune'na maryawibwa'desi. ¹³ Gotiyai wakyaka aane pimili' kimili' gamire sinnyiki lika yiniga wi'na yulyaranne' mi'. Aawa. Yuya kaanya yuya basinadaa'na yaka yi Gotiyari tinnyari wana ku'maayaba warikengi. Yi Gotiyai yune sahwaina nemi yadaanya sabwi maryawibwaradengira. Neminyi Gotiyai yagaainakelyira.

**Gotiyarina Mubithika Yira'de Naangei kininnakeina
diraginna jalikurakaanne'nesi.**

¹⁴ Sarevidaa'nyi dara yaana! Nemire Gotiyarina Mubithika Yira'de Naangaangei Sigunyavi ke'mwewinyavi Gotiyaryabanna yilayi'mavakei sai Jizaazai Gotiyare Gawaalivaangei kininnakeina mwaaihovi yi nemi sahwarine jalikurakyabwi nayaa diraginna limwagaraana! ¹⁵ Sare' darevinyi. Nemi saina wagilyavi walamarakya'neina diraginya maayaine. Nemire wirisangina Gotiyarina Yira'de Naangei yawi'daa'nyi neminyina kale mwi yannei mi'. Aawa. Yuya yijiwaala sa neminyi neyima'nadevaabi' yuya daza gami kwari yijiwaala ya'ne mena yima'nakengi. Sare kir!' sahwai wagilya myakelyi. Sarei neminyina yibwakidevina neyivaimwagannelyi. ¹⁶ Sarevidaa'nyi nemi lika myadaa Gotiyaryawi gamire kinginamwaalyisavina gaimakunna wilaana! Sahwai yi yanga gaimwangebwi kininnakelyi. Nemi gamire kale gaimwangebwi maarya'neina nabaai taanginya neyima'nadaaworiyagaa' gamire yanga gaimwangebwi neminyi neya'neina sahwaryawinna wawaana!

5 ¹ Gotiyarina Yira'de Naanga gazarizari dahilakyabwi sa' daresi. Gotiyai a'mweraayawidaa'nyi a'mwe pwari dahilakada Gotiyare wawinyanginei wimwaaihadelyi. Gotiyareraavi gaimwagya'nei Gotiyaryaba sahwaraavina marewidadelyi. Yi sahwai Gotiyari yanga dala pininna pininna wijaaya'neji wagila marasi'nya'ne'na Gotiyarine tamiravawijaaya'neji wawinya kininnakelyi. ² Gami sai piburaavina diraginya maayai mwaaidevina a'mwe simunya maayara Gotiyare tusavi yagalya'ma'divisaraavina yibwakida kave yiniga wi'na bwiwanna

widannelyi. ³Sahwai yune diraginyai mamwaalyadevi a'mweraavire wagilya marasi'nya'nei Gotiyari tamiravawijaavadevaai' gami kwarinaji tamiravawijaaya'ne tivikita wari'. ⁴Mubithika Yira'de Naangere wawinya daza' yaya naange' kininnakesi. A'mwe aane pwai kwai yune gamire saburidaasi wawinya daza' maa'dei mi'. Aawa. Gotiyai Ne Eronimi Yira'de Naanga sinnawinyari jaka wijaakabaaibi' a'mwe sari jaka widadaasiyagaa' sahwai wawinya daza' limwadelyi. ⁵Sarebaabi' Kiraazitiyai kwalyi sarelyi. Sahwai byaannyavi yune gaminne yaya'na munyaba mamakilyada Yira'de Naangei yima'nakai mi'. Aawa. Gotiyai gami sai sahwari wawinya daza' ya'neri dahilakakelyi. Sarevina sahwari dara wida'

“Gimi niminyi Nyibwaalivaangeiginyira.

Dahaa' Gimaamaangeinyi gimwaaihiweiginyi.”

⁶Nabaai sabaabi' pimaginyavi dara da'

“Yira'dinya yuyagaa' yuyagaa'neiginyi.

Melikizathekimivaavirebwina avaainanyaiginyi gimwaaihiweiginyi.”

⁷Kigaa' Jizaazai Kwaakevakina kilaa'nakei mwaalakegaa' sahwai Gotiyari widada yidaanganakelyi. Yi sahwai jaka naangesi kidaraalyaji Gotiyai balyavi yiniga wi'na maaranneri widakelyi. Sahwai gannyabwi kwaakewi marulawakada yi Gotiyari dalaangewi wila'na'da sarevi yi Gotiyai gamire yagaala widakevi kadika wi'nakelyi. ⁸Sahwai Gotiyare Gawaalivaangei kwai kiri' sahwai daange' maarakevi Gotiyari midinya'na sasare sabwina gamire simunyavi nebulya'na yiwiryakelyi. ⁹Daza' yi Gotiyarine yune nebulya'nanyari marima'na'. Sarevi sahwai a'mwe yuyara gaminyi mididivisaraavi yuyagaa'na wivadaihasamaarannelyi. ¹⁰Yi Gotiyai sahwari dahilakaka diraginna wida' “ ‘Gimi Mubithika Yira'dinya Naangeigi,' githiwa! Melikizathekimivaavi avaainanyaiginyira.”

¹¹Melikizatheki ke'ba'nanyarine yagaala kwalaalya wari'. Yi nemi sanna yihithaathe'nanyi. Kiri' dahaa' sarimire simunya kaanya tih'i'nika yi simunya yime'nya'bi' yawirarilaaya myaihilyi. Sarevi sariminyi yibwaridaakwia'ne yagaala dazavire aaya kaavilyavi yi nemi yagiyagi wawinya' kininnakeine. ¹²Sare' daresi. Kigaakuna Kiraazitiyari limwagesaihilyi. Yirikeri' sarimi wijiwaakyaihi mwaalya'na yiniga wi'na yiwaa'. Kiri' aawa. Yi a'mwei pwai sariminyi mudi'nanya aaya kaavila Gotiyare yagaalya' ayahi nayaa yihiziwaakya'nerina sariminyi simunya'na tuta yihimudaasivani'. Yi bwaranyai yune aamunya' maarya'neri wimudaasadevaabi' mudi'nanyanna yihimudaasivani'. A'mwera wapaaya diraginya nya'neraavi wimudaasadevaabi' sarimi yagaala naangenna yiniga wi'na wi'namaapineihi mi'. ¹³Sare' darevinyi. Gazaizai mudi'nanyanna kuna yaamiji yawi'dei simunya yida'maraangebwinna nayaa yawi'dei mi'. Yi bwaranyai yune aamunya' nadevaabisa'nanyi. ¹⁴Nabaai kiri' wapaaya diraginya a'mwe naangera

nadivitabaabi! Gotiyarine aayanna a'mwe sidu'nakeraavinengira. Sahwara nawi'nyanna yadivisare. A'mwe sasarera yi kwalaalyagaa' kunnya simunyangi yiwirinya yadivisare. Yi sahwara nawi'nyabulyi kayaa'nanyabulyi mena wi'na maryawibwarya'nera kuna nayaa yadivi' yiwirinya yadivisare. Kiri' sarimi aawa.

6 ¹Kaimiraayarabisaihi kuna namwaaibithika! Sarevidaa'nyi nemi Kiraazitiyarine yune yagaala mudi'nanya sasare savina mamwalaanna! Aawa. Nemi kuna wawaaji a'mwe naanga mena yinikerabi' yagaala naangebwinna daana! Yi kwalaalyagaa' nemi angevine likila ayina, ayina yadaanyabaabi' yagaala yune mudi'nanyanna madaanna! Mudi'nanya darengi. A'mwera kayaa'nanyabwi balya'bisabwina yagalya'maya'nera simunya mudika nayaa yawiramaapika! Yi sara yapiji Gotiyari nayaa limwabika! ²Nabaai pwara sahwarraavi dara wiwiripika! Yi aalya yinya'ne dala pininna pininnanya nayaa yawibwapi'de'nanyi. Yi Kiraazitiyare kusilaanyavi wilya'nesi Kurya Tewaanyari maarya'nesi sahwarraavi ata dathiwabi'de'nanyi. Yi Gotiyai a'mwe yuya bainikeraavi ayina yidikaavade'nanyi. Yi Gotiyai a'mweraavi maryawibwaroji yuyagaa' yuyagaa'ne tivikisabwi wijaavade'nanyi. Sara wiwirip'desi. ³Nabaai Gotiyai “Ya!” daza' yi nemi mudi'nanya sasarena muji yawaaji naangenna yihithaana!

⁴Sare' darevinyi. Jizaazarina nayaa jawiranganyila! A'mwera Kiraazitiyarine bule'na wijaavipija' sahwara simunya mudike' maarya'neraavi yiniga wi'na ayina gara wimwaihaanneraavaka! Sahwara pigaa' Gotiyare baake' kumire simunyavi mena wannakera. Yi sahwara Sigunyavidaa'nyi walaabake yange' mena nagaangesare. Yi Kurya Tewaanyari sahwara ye'mwannamaaresara. ⁵Yi Gotiyare yagaalya' yaamiji yadivi' dara yawiresare “Yi sa' tewaanya nawi'nyaange!” Yi Gotiyare diraginya nawi'nya divi yima'nya'ne'na mena yibwakinesara. ⁶Yi sarera sara mwaabiza' kiri' wala'daawadivi' Kiraazitiyari bule'na wijaavipija' kumire tusa' simunya mudikebwi ayina yawiramaarya'ne' yi aawa. Yi sasare dazabwi kumi kwara Gotiyare Gawaalivaangeri yisaviri ayina tamarimupi'devaabisasi. Sahwara tamarimupijari ku'maayaba a'mwera birala dangabi'delyira. Sare'na mala nayaa jiwannyila!

⁷Sare' darevinyi. A'mwera darerera. Kwaaka kwalaalyagaa' burike' waidaavadevi tika munne maranya'ne nawi'nya yiri'devaki Gotiyai tewaanya naanga yanga yadevakira. Yi a'mwe Gotiyai nawi'nyangi wijaavadera nawi'nyabura nayaa yadivisaraavi sahwai tewaanya naanga yanga yaderera. ⁸Kiri', nabaai pwara nawi'nya myadivisara darerera. Kwaaka yune wila langa kininnaka dala pininna pininnanyaji kurivaariya dala pininna pininnanyaji yiri'deva' kayaa'nanyavaki. Sava' Gotiyai kayaaka yadevina yi nebawa mi'. Dividaa'nyi yi dike' nakadevakira.

⁹Sariminyina nyivu'nadeihi, dahaa' nemi yagaala taanginya daza' diwo. Kiri' nemi sariminyina nebulya' yawiramaa'manigo. Yi sarimi sasare sabwi wavila'divi' kayaaka sasara jideihi mi'. Aawa. “Gotiyai padaihasamaarakeina mwalaaja' nemi sareina nawi'nyabwina yaadeinera,” dithinyideihilyi. ¹⁰Sare' darevinyi. Gotiyai yida'na myadei midaa'! Sahwai wawinya yuya sarimi yeta sanna simunya navika yadei midaa'! Sariminyi Gotiyarina yihivu'nadaa'nyi gamire a'mwe tewaanyaraavi gaimwange'na widaayesaihilyi. Yi sasare sara kuna yadivisaihilyi. Yi daza' sariminyi Gotiyarina yihivu'nadevwi wibwaridaakwadesi. Sare' sahwai yida'nanyai sariminyina navika yadei mi'.

¹¹Yi neminyi tewaanya dara nevu'nivani'. Sariminyidaa'nya gazaizai Kiraazitiyari diraginna limwadevwi avainanya' kuna wibwaridaakwana! Yi pada'galalimwanga yadivi' Gotiyai nedakenna kwaamu' jemwaalyila! Kuna yiwawagopijaihi yune yiwiya yaja sarimiregaa'na sasara yune diraginna jila! ¹²Sarimi maa'na nayihinadika! Aawa. A'mwera nebulya'na diraginna limwaga'divisara maa'na yarai mwinyakera mwaaidivi' diraginna daa'divi' sinnawi Gotiyai yune naanga nebulya'na dake gamireraavi wijaaya'na yuya kuna maa'divisaraavirebwi sarimi nayaa pada'galamidinya jila! ¹³Sare' darevinyi. Sinnawi Gotiyai Eviraamimi yune naanga nebulya'na wija' yagaala diraginya' wijaa'. A'mwei naangei yaka Gotiyari wavilavikei aawa. Yi a'mwei pwai mi'. Pwarine yayavi Gotiyai yagaala diraginya' wija'nei mamwaalyi'. Aawa. Sarevidaa'nyi yi Gotiyai yagaala diraginya' gaminne yayavina wijaakelyi. ¹⁴Sahwai dara wijaa' “Nimi yagaala nebulyava'na diwa. Yi nimi giminyi tewaanya naanga yanga yune'na gideinyi. Yi nimi gimire diviya jakwalaangeraavi kwalaalya kwalaalyaraavi gimavigimwaaihidere.” ¹⁵Sarevidaa'nyi Eviraami diraginna limwaga'da maa'na winyaakei mamwaalyada yemwaaina yaakevi dividaa'nyi “Sara gideinyi,” wijaakabaabi' sahwai sara maryaakebuluyi. ¹⁶Sare' darevinyi. Yagaala diraginya' nebulya'na javwi yi sa' daresi. A'mwera yagaala diraginya' ja'negaa' sahwaraavine wavila'dere yayavi nebulya'na dadivisare. Nabaai yagaala diraginya sa' yuya yagaainakeburaavina yi a'mwe pwaraavire maangengi kaanya tihiralimwagata ya'nesira. Yi dazasa' yagaala sangi aaya kaavilya' tivi'nanyasi. ¹⁷Sarevi Gotiyai gamire kaimiraayainaavi gaimwange'na “Nimire yagaala dazavi maravila'nya ya'neinyi mi'. Sahiri' wana ku'maayaba yibwaridaakuma!” dakelyi. Sara dada yi sahwai yune gannya yagaalyavi diraginya yiwagya'ne'na yagaala diraginya' nebulya'na dakelyi. ¹⁸Nabaai sawaai yune naanga nebulya'na wijasi yagaala diraginyasi sawaai maravila'nya mi ya'newaai kininnakeine. Yi piriwaala daza'na Gotiyai kwaasi dannei mi'. Arikewi. Yi dazawaai nebulya'na diraginya yivaimwanga neyadewaalyi. Nemi a'mweinaavire

simunyangi likaanya wodaa Gotiyari gidikusaba lika yulya'daanyainaavi. Gotiyai neminyina yune naanga nebulya'na dake'na nemi Gotiyari nayaa pada'galalimwagata yadaa nemi sahiri' kuna yemwaalyabwina maarya'neina sahwayawi lika yulya'daanyaine. ¹⁹Sipiya' wila naangevasi yi'divaidevaabi' nemire Jizaazari yemwaalyabwi sahware nevwiyadevaabi' sahware diraginaanga limwaga'daanyaine. Gotiyarina Mubithika Yira'divita Naangera Gotiyare angevi kusawinya jannevi wilaaweva kusawi yunewinna widivitabaabi' Jizaazai Sigunyaviyavi wila'. Nabaai Jizaazari yemwaalyabwi Gotiyaryabanna nemire simunyavi marima'naabadesi. ²⁰Yi sahibanna Sigunyavi ku'dika yarinika dazavi sinnawi Jizaazai gamidaasi neminyi negaimwange'na wilakelyi. Yi sawhai neminyine'na Mubithika Yira'de Naangei yuyagaa' yuyagaa'nei Melikizathekimivaavi avaananyai yima'nakelyi.

7 ¹Melikizathekimina daresi. Sawhai Anga Selemi kingiyai maremwalyaa'. Yi sawhai Gotiya Munya Ke'banya Nebulya'nanyare mubithika yira'delyi. Sinnawi Eviraamimiva kingiyaraavi mala mena dathiwanna yaka yi angebanna ayina yagalaawina yadaa'nyi yi tusavi Melikizatheki sai sawhari wirata'nyina yaka tewaanya naanga yanga widakelyi. ²Yi Eviraami gilyivita yuya kingiyaraavi maarake jaapalaka ata yuyiraalya pimagingya piri' Melikizathekimi wijaavakelyi. Nemi Melikizathekima yaya maridaana! Daza' daresi. Tewaanya yida'maraangeburiya kingiyalyi. Sai kingiya Selemine kwalyi. Selemi aaya kaavila dazavire' daresi. Kwaamu'nanyaburiya kingiyalyi. ³Gotiyare bukuyavi ganimaangelyi ganaangesi sayorina madinyikesi. Nabaai sawhari gyakwalaangeraavina madinyike'na sawhara kuneibisalyi. Nabaai avaananya'na ganaange' maaraka yirikeri' kunelyi. Nabaai gami balya'ne yirikeri' kunelyi. Sarena sawhai Gotiyare Gawaalivaangeibisalyi. Yi Gotiyarina yira'dei yuyagaa' yuyagaa' kuna mwaali'.

⁴Melikizatheki dazarina nayaa jawirila! Sai yaya naanga nebulya'na yima'nakelyi. Nemire neyakwalaanga aaya mudi'nanyai Eviraami yuya gilyivita malyavi maarake yanga muda'. Yi sawhai Melikizathekimina ata yuyiraai jaapalaka yi atiraalya pimagingya tewaanyanna tewaanyannanya wijaava' aaya mudi'nanyai. Sarevi "Yi Melikizatheki a'mwe sai naangaangelyireva," dadaanyi. ⁵Nabaai piri' daresi. Livaayaridaa'nya gyakwalaangera mubithika yira'divisare. Sawharaavine kiwinya' dinikesi. Yi Gotiyare kiwinyavi dara dini' "Yizireliyaraavire gilyivita mudika yuya atiraalya pimagingya' maapika!" Yizireliyara sawharaavi kwiya'mwe nebulya'nanyara yi Eviraamimire saanyaavaakidaa'nyara mwaaleta kiri' Livaayara sawhara kwiya'mweraavire gilyivita atiraalya pimagingya' maa'divisare. ⁶Piri' daresi. Melikizatheki sawhai sawharaavire yisavaakidaasi yima'nakai mi'. Menyalyi.

Kiri' sai Eviraamimina gilyivisa atiraalya pimagingya' maarakelyi. Nabaai Eviraami Gotiyare yune naanga nebulya'na wija kininnakeri Melikizatheki sahwai yagaala tewaanya naanga yanga widakelyi. ⁷Nemi mena yawi'manigo. A'mwe yagaala tewaanya naanga yanga yadei sai munyabanyi. Yi a'mwei sahware yagaala tewaanya naanga yanga widade' maa'dei, yi sai kwaakewinyi. Sareburina yagaainake' mwari'. ⁸Nabaai piburaai wari'. Yi piri' daresi. Livaayara atiraalya pimagingya maa'divitarah sahwarah a'mwe balya'nere. Yi piri' daresi. Melikizatheki atiraalya pimagingya maarakerina dara jalikurakini' "Sai gaala mwaali'." ⁹Yi nemi yiniga dara daanneine. Nebulyasi. Livaayai sai yi a'mwe gilyivita atiraalya pimagingya sa' maa'delyi. Kiri' sinnawi Melikizatheki atiraalya pimagingya' Eviraamimire maara'. Yi dazarevi sai atiraalya pimagingya' Livaayai kwareji maara'. ¹⁰Sare' darevinyi. Melikizatheki Eviraamimi tusavi wirata'nagila Livaayai gannya gyakwalaangere saanyavaaki kuna yi'nadi'nyi Eviraami wijaavaka kiri' Livaayai wijaava'. Sarevi Eviraamimiji Livaayarevaakiyaraaviji wavila'delyi Melikizatheki.

¹¹Sare'na dara jawirila! Yizireliyaraavina Gotiyai gamire kiwinya' wijaayaburi aaya kaavilya' yi sa' Livaayara Gotiyarina mubithika yira'divisabulyi. Kiri' Livaayaraavirebwi sabwi Gotiyarina a'mweraavi yida'maraangeraavi nebulya'na wimwaaiahaji kwaji dividaa'nyi Mubithika Yira'de Naanga geibi' yima'nakerina a'mweraavi be'na wimudaasanneraavaka! Gawaalivaangei Yira'de Naangei sai Melikizathekimivaavine avaainanyai. Yi sai Livaayarevaakidaasa Eronimirevaakidaasaraavi avaainanyaina mi'. ¹²Sare' dara yima'nakesi. Mubithika yira'divisaraavire savaa' wavila'nya yake'na tivikita dare' wari'. Yi nabaai kiwinya kirisi nayaa wavila'nakesi. Yagaala mudike' yima'naabakesi. ¹³Sare' darevinyi. Gotiyare bukuyavi dinika dazai Yira'de Naanga mudikei yi sai yita pivaakiyalyi. Eronimirevaakiyai mi'. Sinnawi kwaraanyaba yira'divisavi widaayakei gamire yita savaaki a'mwei aane pwai kwai mi'. ¹⁴Sare' darevinyi. Nemi mena yawi'manigo. Nemire Naangei sai Juthare yita savaakidaasi yima'nakelyi. Yi Mozizai yita dazavaakina yira'divisaraavine yagaala aane pimili' kimili' majaa'. ¹⁵Nabaai tamira'de dazai pwai yima'naka yi sai Melikizathekimivaavi avaainanyarina nemi mena yawirangamanigo. Yagaala dazavire aaya kaavilya' wana ku'maayaba wari'. ¹⁶Sahwai Mubithika Yira'dei yima'na'. Gamire kilaakevine kiwinya'nanya' mi'. Gamire yisavaakire'na mi'. Aawa. Gaalya' yuyagaa' yuyagaa'nevire diraginya yune sahirisa' yakelyi. ¹⁷Sare' darevinyi. Gotiyare bukuyavi dara jalikurakinikesi.

Gimi yuyagaa' yuyagaa'ne Yira'dinyaigi

Yi Melikizathekimivaavi avaainanyaigi mwaaidinyaiginyira.

¹⁸Sare' darevinyi. Piri' daresi. Yira'divisaraavirevaakine dakinike' sinnawinya' Gotiyai mena marasi'nakesi. Yi kiwinya daza' diraginya

maaya' neminyi yiniga wi'na manegaimwagyade'na marasi'nakesi. 19 Sare' darevinyi. Ne Mozizare kiwinya' Gotiyarina yida'maraanga aane pwari kirivi yune nebulya'na yima'naabaka' mi'. Piri' daresi. Gotiyai pibwi dara yima'naabakesi. Gotiyare kiwinyavina maalike yemwaalya'nengi. Gawaalivaangei Yira'derina naangaange yemwaalya'nengira. Yi sahwarina nemi Gotiyaryaba gidikusabanna wawaanneinera.

20 Nabaai sahwaru Yira'deri Gotiyai dahilakakegaa' sai yaasiwa' dahilakya mya'. Aawa. Sai yagaala diraginya' gaminne yayavina daka yi sahwaru dahilaka'. Sare' darevinyi. Piri' daresi. Sinnawinya yira'divita sahwaru Livaayaraavi sara mya'. Yagaalya' yune'na diraginya' nebulya'na dake'na Livaayara sahwaru yira'divisara yima'nya'neravina aane pwai kwari sara madahilakya'. 21 Piri' daresi. Gotiyai gami sai Gawaalivaangeri yira'dei yima'nya'neri yagaala diraginya' gaminne yayavina dakelyi. "Daaina! Nyigivina!" widadivitabaabi' diraginna sara dakakelyi. Sahwaru dara widakelyi

"Naangeinyi nimirne yayavina nebulya'na mena dena,
Yi sahwayini simunya' ayahi maravila'nya mye.

'Yira'dinya yuyagaa' yuyagaa'neigi dimwaaalago'deiginyi.' "

22 Yuya sarevidaa'nyi yi nemi yawi'manigo'nanyi. Jizaazarina yagaala wilimwagarikebwi yi sa' tewaanaangesi. Sa' yi kiwinya' dakinika sinnawinyavi wawilavikesi. 23 Nabaai piri' daresi. Sinnawi a'mwe kwalaalyara yira'divitara mwaalesare. Yi yuyara balya ya'nera yuyagaa' mamwaalyi yipinere. Gazaizai wawinya sa' maaraka balake'na yagalya'mavakelyi. 24 Piri' daresi. Jizaazai Yira'de yuyagaa' yuyagaa'nei kuna mwaaide'na wawinya sa' yagalya'mavadei mi'. Yuyagaa' sa' limwagaradelyi. Sa' makwasakade' mi'. 25 Sarevidaa'nyi yi sawhai a'mwera gaminyine'na Gotiyaryabanna gidiku' badivisaraavi yiniga wi'na padaihasamaarannelyi. Yi yuyagaa' yuyagaa' gaalyabulyiyai mwaaida sawharaavina Gotiyari marewidadevi sawharaavi yune'na padaihasamaa'delyi.

26 Sare' darevinyi. Mubithika Yira'de Naanga sasare dazai neminyi negaimwagya'nelyi. Yunebannanyalyi. Sai Gotiyari yilaaya wigaidei giri'maayai nawi'nyalyi. Yi dazari kayaa'nanya aane piri' kiri' warika' mi'. Yunebanna yune nawi'nyaangelyi. Yi yiwetawakya maayalyi. Yi kayaa'nanyara yadivitabaabi' sai yadei mi'. Sai nebulya'nanyai nabinyalyi. Sari Sigunyavi munya ke'bevanya'na Gotiyai makilaawakelyi. 27 Sawhai Yira'divita Naanga pwarabisai mika! Sai kayaa'nanyabwi myadevina gamire yiwetawakya'na marasi'nya'nei kwaraanyaba sipizipiyari yirasa'na wimudaasadei mika. Sinnawinyara yuya yirikerikaavi aayagaa' kumire wagilya marasi'nya'na kwaraanyaba sipizipiyari kuminnedaaasi yira'na yadivisare. Yi nabaai ayahi dividaa'nyi

a'mweraavire wagilyanna avaaaina yadivisare. Sarei mika! Sare' darevinyi. A'mweraavire wagilyanna sai wijaavinya'nei gami sari yuyagaa'ne gave pigaa'na yakelyi. Sahwai gamire gaalya' Gotiyarina wijaavakelyi. ²⁸Sare' darevinyi. Mozizare kiwinya' a'mwe yira'divitara yima'nya'nera diraginya maayara mwaaidivita kiri' sahwaravahi dahilakadesi kiwinya'. Kiri' Gotiyare yagaalya' gamire yayavina yagaala diraginyasi kiwinyavi dividaa'nyi yima'nake' yi sa' Gawaalivaangeri dahilakakesi. Yi Gawaalivaanga sahwai yuyagaa' yuyagaa'ne yune nebulya'nanyai yune yida'maraangei mwaaidelyi. Yi sahwai neminyina yuyagaa' yuyagaa'ne Yira'de Naangelyi.

**Gotiyare anga nebulya'nanya Sigunyaviyavi Jizaazai
Mubithika Yira'de Naangei yivanikeburinesi.**

8 ¹Yi, yagaala dazaviya minyaginya' nemi divanigo', sa' yi darsi. Dazai neminyine Yira'de Naanga sarei kininnakeine. Yi naangeba namwaalyisari aangesimagi Kingiya Aaya Mudi'nanya Sigunyaviyarevi sai mena walamwaalakelyi. ²Sai Yira'de Naangei Gotiyare anga giri'maaya nawi'nyavi widaayadelyi. Yi Seli anga daza' yileanga nebulya'nanyasi. Daza' a'mwe kwai maridaakwaka' mi'. Aawa. Yune Naangei Gotiyai daakwakesi. Yi sahibanne widaayadelyi. ³Sare' darevinyi. Yira'de Naanga gazaizai a'mweraavina Gotiyari yanga dala pininna pininna wijaaya'neji yiwetawakyanna Gotiyarine tamiravawijaaya'neji wawinya'na dahilakinikelyi. Sarevidaa'nyi nabaai neminyinei dazai wijaaya'ne' kininnakerine wawinya' warikelyi. ⁴Sarevidaa'nyi Kwaaka davaki kuna mwaaidori kwaji sai yira'dei mamwaalyi kyadika! Yi Kiwinyavi dinikabaabi' pwara Gotiyari yanga dala pininna pininna wijaaya'nera yira'divisara mwaaihasa'nanyi. ⁵Sahwara Kwaakevakiya Gotiyare Anga dazavi wawinya yira'divisa' limwaga'divisare. Anga sa' anga nawi'nya nebulya'nanya Sigunyavi mannikewi ke'ba'nanya' a'mabaalyinanya' warikesi. Ne Mozizai Gotiyare seli ange' maridaakwakegaa' Gotiyai anga savina sahware diraginna widakebisasi. Sare' darevinyi. Sai dara da' "Gimi mala nayaa jiwannana! Yiniga nebulya'na avaala daza' nimi giminyi mugunyavi givwaridaakwebaabi' yi anga saviya yuyangi sara javikarideiginyira." Yi Sigunyavi nebulya'nanya daza' warikesi. ⁶Nabaai dahaa' saba Kirazitiyai Yira'de Naangere wawinya' mena maarakelyi. Yi wawinya daza' Yira'divita Naanga pwaraavirevi nebulya'na wawilavikesi. Yi sai Gotiyariji a'mweraaviji mariraku'dere yagaala wilimwagarika sa' yagaala wilimwagaraka sinnawinyavi wawilavikabaabi' Yira'divita Naanga pwaraavirevi nebulya'na wawilavikesi. Nabaai yagaala wilimwagarikebwi Kirazitiyarine savi Gotiyai yune naanga nebulya'na wija yi kiwinyavi yune naanga nebulya'na wijangi wawilavike nawi'nya naanga warikesi.

Yagaala wilimwagarika daza' yune naanga nebulya'na wija dazangi Gotiyai yima'naabakesi.

⁷Sare' darevinyi. Yagaala wilimwagaraka sinnawinya' yiwetawakya yune maaya' waraji kwaji yi Gotiyai “Yagaala wilimwagaraka dazavineba diviya piri' wakideinyira,” myawiri kyadi'. ⁸Sare' darevinyi. Yizireliyara gamire kiwinyavi galazekivalesaraavire yiwetawakyanna yawiraka Gotiyai gamire bukuyavi da'. Yi dara dinikesi.

Naangeinyi diwa “Yithaa! Divi yirikerika yima'naabathegaa' Yizireliyaraavire yisavaasi Juthiyaraavire yisavaasi saraavina Yi nimi yagaala wilimwagarade mudike' dakideinyi.

⁹Mudika daza' sinnawinya' dakage sa'bita' mi'.

Kwiyakwalaangeraavi nimore asilyi wibwaridaakwia'neinyi Yizipi Kwaakevi yagalya'mavesaraavi makwawegaa' Kwiyakwalaangeraavi yagaala sa' dake sa'bita' mi'.

Nimore yagaala wilimwagaraka kuna mamidinyesa'na Nimi sahwarraavi wanganake,” Naangeinyi diweinyi.

Sarevidaa'nyi yagaala wilimwagarade mudike' yideinyi.

¹⁰“Sare' yirika sarika mena kyoji

Yizireliyaraavire yisavaasi mudika daza' ye'mwannayideinyi.”

Naangeinyi diwa. Yagaala wilimwagarade sa' daresi.

Kumire yawisavina nimore kiwinyangi wilakidengi.

Kumire simunyavina dazangi pikarya yidavidengi.

Nabaai nimi kuminyi Gotiyainyi mwaalideinyi.

Nabaai kumi niminyi a'mwera mwaaibi'dere.

¹¹Sarevidaa' nyi gazaizai gamire angebanyari wijiwaakadei mi'.

Nabaai gazaizai gathaa'gahwaari wijiwaakya'ne' mwari'.

“Naangeri nayaa jawirangana!” wdathei mi'.

Yi dazagaa' nimore a'mwe yuyara nayaa nyawirangabi'dere.

Maalikeraji a'mwe naanga kwaraji nyawirangadaapiya'na

Sara wijiwaakya'ne wawinya wimudaasadera mi'.

¹²Sahwarraavi nimi kale gaimwanga wide'

Kumire yiwetawakyangine tivikita marasi'nide'nanyi.

Yi kumire kayaa'nanyabwina siduta ayahi yawirideinyi mi'.

Sareinyi yide sare'na yuyara nyawirangabi'deinyi.

Gotiyare bukuyavi sara dinikesi. ¹³Dinikevina “Mudikeva!” dakevi yi sinnawinya' aya mena dakinikesi. “Yarai yimaannadesi,” yawirakesi. Yi yuya aya yima'nivanike yi neibisangi. Sa yune maalikegaa'na waradengi. Yi yinahu yuya yiwina yadengi. Sarebaaibi' yagaala wilimwagaraka sinnawinya' sara yadesi.

9 ¹Sarevidaa'nyi yagaala wilimwagaraka aaya mudi'nanyavi Gotiyai yilaaya'na ya'ne kiwinya pini dakakesi. Nabaai yagaala savine ange' Kwaaka dathavakiya' mannikesi. ²Sare' daresi. Anga seli anga

sa' maridaakwesa'. Yi aaya ku'dika yarinika pimagingya mudi'nanyavi laamuyalyi yi'binya Gotiyari wijaaya'ne girikula daza kininnakesi sawaai wari'. Ku'dika yarinika dazavina “Ku'dika Tewaanyava. (Girikita'nanya maayava),” wo'nikesi. ³Kusawinya janne naange' kurike'bi' timudaakunika bulyimagidaasi janne ayahidaasi ku'dika piri' “Ku'dika Tewaanya Nebulya'nanyava,” wo'nikesi. ⁴Jita wabatirinya yiravayihurya'ne' di'binya goliya yavikarinike' ku'dika dazavi simaginyavi wa'desi. Nabaai kusawi bukuta yagaala wilimwagarakebwi kiri' warikesi. Yunewinna bwakakinike' bukuta sare yuya simagingya yune goliyasina. Bukusavi kusawi maa'gula goliyavi wapaaya manaaya' wila'di'nyiya' wari'. Nabaai bukusavi kusawi Eronimire yadisari' yaalika mena yinikeri' kiri' kwaraka yirivakeri' wari'. Nabaai sila pwaraai sinnawi Gotiyai yagaala wilimwagarakeburiya silyaraari pikarya yidavakeraai wari'. Yi yuya sa bukusavi wilakakengi. ⁵Bukuta savi Gotiyari sinna tika wida'devwi munyaba ejeliyaraaibi' pivinakeraai byaanna diraginyasiyaraai yilamwaali'. Yi saraare piyangi kwaakewi bukusavi bwakakya savi Gotiyari sinna tika wida'devwi marasi'nya'ne tawe livirikurya'nebe. Kiri' dahaa' yuya dazangire aaya kaavilya' nimi tivi'nanya'na marima'naabidehaa' mi'. Kunegaaki.

⁶Yuya daza mena kwara' yi piri' daresi. Yuya yirikerikaavi ku'dika aaya mudi'nanyavi mubithika yira'divisara kunnya wawinya Gotiyarine ya'nera widaawadivisare. ⁷Piri' daresi. Kwarama gazasavi yune gave pigaa'na ku'dika ayahidaasavi Yira'de Naangei gave pwainanyai wilakelyi. Nabaai sai yaasiwa'wilya yakai mi'. Aawa. Sai tamira'divisavi tawe' maa'da wilakelyi. Yi tawe pirivi gaminne wagilya myawiryade yake marasi'nya'nenna yi tawe pirivi wagilya a'mwera nayaa myawiryadivi' yesa marasi'nya'nenna Gotiyarina wijaavakelyi. ⁸Sasare dazaburi Kurya Tewaanyai dara neyibwaridaakuvani'. Yagaala wilimwagaraka sinnawinyaviya angevire wawinya kuna warakegaa' janne' kuna timudaakwakegaa' yi nemire tuta Gotiyare Ku'dika Tewaanya Nebulya'nanyavina yinigulike' sa' yi ku'maayaba mima'naabyakesi. ⁹Yi anga sinnawinya sa' yi dathahaa'nabi' dahilakake' ke'ba'nanyasi. Sinnawi anga dazavi a'mwera Gotiyarina yanga dala pininna pininnanyaji yira'divita saji wijaavadivisare. Kiri' yuya sa wijaavadivita sa Gotiyari ya'ne pware simunyi padaihirakyari yune nebulya'na yavada'galanne mi'. Yi sahwai gannya simunyari kuna yawi'na “Nimire yiwetawakya' kuna wari'.” Sareibisara Gotiyare angevi wilaawetara mi'. ¹⁰Yi sasare sabwi dara dini' “Wapaaya sa dinana! Sa kimaakiya maninna! Aalya sa dinana! Aalya pini kimaakiyangi. Aalya yinya'nebwina sana sana ja!” Yi yuya sa kilaaka mwasimaginyavi duimwagasi'nya'nebulyi. Gotiyai dakake kiwinya yuya daza yi sahwara midinya'neraavina yune aaya mudikebwi sahwai nayaa yima'naabazahaa'nanyi. Kiraazitiyarina

yagaala nelimwagarika mudike' dakajahaa'nanyi. ¹¹Sare' kiri' dahaa' Kiraazitiyai mena yima'naaba'. Yi sahwai yuya nawi'nya yima'nakenna nemi yibwakimanigongine Mubithika Yira'de Naangelyi. Sahwai Sigunyavi Gotiyaryabanna yi seli anga naangaange' yida'nanya naangevi kusawi wilaawakelyi. Seli anga daza' Kwaakevakiya sinnawinyavi wavilavikesi. Daza' a'mwera asiraji yavikarya madeta' mi'. Yuya Gotiyai wakyaakejiya' sa' mi'. ¹²Kiraazitiyai anga dazavi wilya'nei yira'divisara yetabaabi' memeyavire tawesi bulimakaawoya diwinyaresi maaraka' mi'. Aawa. Sahwai balakegaa' tamiraya'ne gannya yune tawevina yakelyi. Yaka sai anga tewaanyavi yuyagaa'ne gave pigaa'na wila'. Yi sai yuyagaa' yuyagaa'ne neminyi ayahi mubya yanemaarake'nanyi. ¹³Sare' darevinyi. A'mwe pwaraavire kilaakeji' Gotiyare tinnyari girikita'nanya yima'nadaasi yi yira'divisara sahwaraavi pigaa' memeyavire tawesi pigaa' bulimakaawoya kwalyare tawesi livirikureva nabaai pigaa' bulimakaawoya balya' yune' dika yira'divi' kwaagita yovirawakadivisasi aalyasi girikita'nanyaraavi liviriku'diviki. Sara yadaapi yi kumire kilaakeji' tewaanyaji' yima'naderera. Sara yanne' waraja' ¹⁴yi Kiraazitiyare tawe' ya'ne' dazahirivi yune naanga wavilavikesi. Yi sahwai yuyagaa' yuyagaa'ne Kurya Tewaanyai wigaimwagakei Gotiyarina tamira'divisa'bisa' gamire gaalya' wijaavinakelyi. Yi Kiraazitiyai sari kayaa'nanya aane piri' kiri' wiwarikai mi'. Sarei wijaavinaka sarevidaa'nyi gamire tawe' neminyi kilaaka gaveji'na miwaiipiwagi yannesi. Aawa. Sai nemire simunyari negaida yi dala pininnanya balyaburi midinya'nebwi nemarasi'nannesi. Gotiyai gaalyavi aaya kaavilyari widayaade'na tawe sa' neduimwagasi'nannesi.

¹⁵Sarevidaa'nyi Kiraazitiyai yagaala nelimwagarika mudikevi yiwagya'nei neminyiji Gotiyariji nemariraku'dei mwaali'. Yi sahwai yiwetawakya a'mwera yeta yagaala wilimwagaraka mudi'nanya' kuna marerakegaa' yuya sa marasi'nya'nei sahwaraavi ayahi mubya yamaarya'nei gannya tawesi mena balakelyi. Sarevi yi a'mwera sinnawi Gotiyai gannyanna yuyagaa' yuyagaa'nenna wijaaya'ne kaimiraayaraavi jaka wijivwaramaa'dera yune naanga nebulya'na wija' yi gaala daza' maapi'derera. ¹⁶Sare' darevinyi. A'mwera kumi balya'negaa' kumire gilyivisa maarya'neraavina "Yagaalya' yune'na darigusakima!" dadivi' pikariyikwiri yagaala daza' yida'divisasi. Nabaai kaimiraayara yagaala diraginya dazavine kuvinimaangere gilyivisa maarya'negaa' yi tivikita daregaaki. A'mwera nayaa mena dara kyawiranganapiji "Ganimaangei pikariyikwiri yidavakei nebulya'na baimwaka!" sagaa' kuvibwaalivaangera maadivisagaaki. ¹⁷Sare' darevinyi. Balya'negaa'ne pikariyikwiri yidavakei gaala kuna mwaalajai yi gamire yagaala diraginya' yaasiwa' warina yadevinyi. Yi sahwai mena kabaloji yi yagaala savire diraginya' yima'nadesi. Sara dinike' sara yipi'desi. ¹⁸Sarevidaa'nyi

Gotiyare pikariyikwiri yidavake' yi gamire yagaala wilimwagaraka sinnawinya' yi sa' diraginya' yima'naabya'ne'na aringa tameve gamire tawe' dimave'. Yi aane pwai kwai mabalyi yaji kwaji yagaala sa' diraginnake' myima'nyi kyadi'. ¹⁹Sare' daresi. Aayagaa' Ne Mozizai yuya kiwinyaviya yagaala gazasa' a'mwe yuyaraavi wijiwaakakelyi. Yi dividaa'nyi sai tawe bulimakaawoya diwinyaresi memeyaviresi maaraka aalyasi yegirilaka sipizipiyavire arila wayaake' yita yizopiyaviya taanya maalikengi yewaa'bwaraka yi tawe' kiwinyaviya bukuyavi yirikuraka dividaa'nyi a'mwe yuyaraavi yirikurakelyi. ²⁰Sara yada dara da' "Tawe da' Gotiyari midinya'neihiri yihithakiwake' gamire yagaala yihilimwagarika dazavi diraginya yivaimwanga ya'nesi." ²¹Sarebaaibi' seli angeviji yuya dazaviya widaayadivita yilaaya ya'ne sangi tawe' yirikurakengi. ²²Kiwinyavire saburine nebawa yuya sa tewaanya nawi'nya yima'nya'nenna yune tawe savina yima'nadengi. Girikita'nanya duimwagasi'nadengi. Yi nabaai tawe' mwalaabi yaja' yi Gotiyai a'mweraavire wagilya marasi'dei mi'.

²³Sarevidaa'nyi piri' daresi. Yuya dazabura Sigunyavine warikebanya ke'ba'nanya dazangi, yi Kwaakevaki angesi angeviya yuyaji sangi yiwaipiwagasi'nya'ne yira'divita dazanna wawinya' wari'. Piri' daresi. Sigunya gami saviya tusavi yiwaipiwagasi'nya'ne yira'de tewaanya nebulya'nanya' Kwaakevakiya dazangi wavilavike' ya'nevina tivikita naange' wari'. Yi Kiraazitiyai Sigunyaviya tusavi duimwagasi'nya'nei gamire gaalya' wijaavinake'nanyi. ²⁴Sare' drevinyi. Anga tewaanya nebulya'nanya' a'mwera kunnya asiraji madesavi sahwai wilakai mi'. Yi anga sa' Gotiyare anga nebulya'nanyavine yune kwaasi kwaasi ange'. Yi Kwaakevakiya anga savi wilakai mi'. Aawa. Yune Sigunya kibeva wilakelyi. Sahibanna dahaa' neminyi gaimwagya'nei Gotiaryabanna bi'mavamwaalaka neminyineba marewidadelyi. ²⁵Yuya kwarama sangina Ku'dika Tewaanya Nebulya'nanyavi Yira'de Naanga kwai tawe gamire' mwaryade' wijaaya'nei wilakabaabi' Kiraazitiyai kwalaalyagaa' gami sari wijaavinya'nei Gotiaryaba widaawadei mi'. ²⁶Nabaai sai kwalaalyagaa' sara yaji kwaji aaya Gotiyai Kwaaka wakyaaka dazagaa'daasi yaka yi dahaasi yi sai kwalaalyagaa' daange' kamaaradi'. Kiri' aawa. Yuyagaa'ne gave pigaa'na yirika aaya darikaavi sahwai wagilyangi tivikisa' sahwai tivi'na mubya'nei gami sari tamira'divitabaabi' Gotiyarina wijaavinya'nei Kwaaka davaki ku'maayaba yima'naabakelyi. ²⁷Yi a'mweraavina gave pigaa'na balya'nebwi wari'. Nabaai kabalapiri dividaa'nyi Gotiyai sahwaraavi maryawibwaradevaabi' ²⁸Kiraazitiyai yune gave pigaa'na a'mwe kwalaalyaraavire kayaa'nanyanna makwiya'nei gami sari yira'divisa'bisari Gotiyarina wijaavinakelyi. Nabaai divi pigasaai sahwai bwalyi'mavadelyi. Kiri' sai sagaa' kayaa'nanya marasi'nya'nei

ayina baladei mi'. Aawa. A'mwera "Sahwai walaabana!" dadiwi' yemwaaيمانigasaraavi nebulya'na yune'na padaihasamaarya'nei ku'maayaba yima'naabathelyi.

10 ¹Sare' darevinyi. Mozizare kiwinya' yuya tewaanya yima'nya'nenna a'mabaalyai kininnakesi. Sa' dazanna ke'ba'nanya nebula' mi'. Kiraazitiyai ke'ba'nanya nebulyalyi. Kwaramé gazasavi kiwinyaviya a'mabaalyaibisa yirayirata yadivita avaainanyangi aane pigaa' kigaa' a'mwe yune nebulya'nanyaraavi yiniga wi'na yavada'galanne mi'. Yi yira'divita avaainanya sangina Kiwinya sa' Gotiyaryawinna bipijaraavi tewaanya yune nebulya'nanyaraavi wimwaaihade' mi'. ²Sa' sahwarraavi yavada'galawimwaaiahaji kwaji yi yira'divisangi ayahi mujaayi kipidika! Sare' dare'nesi. Yi a'mwera Gotiyari yilaaya wimaryadivi' gave pigaa'na yune yirasa'ne pirivina kumire kayaa'nanyangi tivi'na duimwagasi'nipiji kwaji yi sahwarra kumire simunyangi wagilya' ayahi pirisi mibwakinyi kipidika! Sare' midaaka! ³Kiri' aawa. Kwaramé gazasavi yirata daza! "Yi sahwarraavi ayahi yawipika!" dada kumire kayaa'nanyanna yadesi. ⁴Sare' darevinyi. Yira'divita bulimakaawoya kwalyaraavire taweji memeyangireji sa kayaa'nanya yiniga wi'na nebulya'na marasi'nanne mi'. Aawaawa. Kuna yawi'divisare.

⁵Sarevi Kwaakevaki Kiraazitiyai divi yisavi balya'nei walaabakegaa' aya kigaa' sai Gotiyari dara wida'

"Bulimakaawoyaraavi yirasa'naji wijaaya'naji gimi 'Aala' yawi'mwaa.

Kiri' gimire simunyaburi midinya'neinyi kilaakeji' yovirawakiwaanyaiginyi.

⁶Dikevi yuya nasi'nya'ne yira'divisaji

Kayaa'nanya marasi'nya'neji yilaaya gihaimwakeigi mi'.

⁷Sagaa' dara githiwa. Yithaa! Gotiyaigi,

Sinnawi bukuyavi niminyina yida'nikabaabi'

Gimirebwi midinya'neinyi mena biwa!"

⁸Daza' sinnawinya' widake! "Giminyine yirasa'neji wijaaya'neji sangina nebwinna givu'nadeigi mi'. Nabaai dika yuya nasi'nya'ne yira'divisaji kayaa'nanya marasi'nya'ne piniji yilaaya gihadeigi mi'." Yi yuya dazangi kiwinya savire saburina wijaavadivi' kir' sara widakesi. ⁹Mena sara widaka sagaa' Gawaalivaangei wida! "Yithaa, gimire simunyabwi midinya'neinyi a'mweraavire kayaa'nanyanna sahwarraaviji giminyiji marirakuride'na mena biwa." Sarevi yi sai "Ayawidaasa' dazabwi diraginna maridaakwima!" daka sinnawinya sabwi marasi'nakelyi.

¹⁰Jizaazai Kiraazitiyai Gotiyare simunya dazabwi midida yi simunya avaalya' kininnakei gannya yune kilaakeji' yirasa'neji' wijaava' yune gave pigaa'na. Wijaavakevi aalya neyaka Gotiyari simunya

dazavina neminyi Gotiyare tewaanyainaavi neyavada'galakelyi. ¹¹Piri' daresi. Yuya yirikerikaavi yira'de gazaizai daa'da gannya wawinya yadelyi. Yi kwalaalya naangegaa' yirata sasare sa'na yadelyi. Kiri' yirata daza kayaa'nanya yiniga wi'na nebulya'na marasi'nanne mi'. Sinnawinya yira'de gazaizai sara daavina yada sara yadelyi. ¹²Kiri', piri' daresi. Kiraazitiyai yira'de sai yuyagaa'ne yune yirata gave piri'na kayaa'nanyanna wijaavinaka yi sai Gotiyare aangasiri diraginnakeba walamwaaina yakei mwaali'. ¹³Sai kuna sara mwaaloji Gotiyaregaa' gamire sivilyiraari dalaangewinna gamire yikamaangeraavi wakadehaa' yi yirika sagaa'na yemwaali'. ¹⁴Sare' darevinyi. Yune yirata gave pwaina wijaavinakevi neminyi tewaanyainaavi neyima'manikeinaavi Kiraazitiyari mena limwaga'daanyainaavi yuyagaa'ne yune nebulya'nanyainaavi yiniga wi'na yavada'galanemwaaihakevinyira.

¹⁵Kurya Tewaanya kwalyi neminyi dara nejalikurakivani'. Yi sare' darevinyi. Sinnawi dara dinikesi.

¹⁶Kiwinyaviya yirika sarika mena kwavilavoji

Yagaala wilimwagarade dare' sahwaraji ye'mwannayideinyi.

Naangeinyi diwa. Yagaala daza' daresi.

Kumire simunyavi nimire kiwinyangi wilakidengi.

Kumire yawisavi dazangi pikarya yidavidengi.

¹⁷Dividaa'nyi yagaala jivwa'mwange' dara dinikesi.

Nabaai kumire kayaa'nanyaji yiwetawakyaji tivikita

Simunya ayahi yawirideinyi mika. Arikewi.

¹⁸Yi Gotiyai wagila daza mena marasi'nyabwi warikevidaa'nyi kayaa'nanyanne tivikisa' yirasa'ne wawinya' ayahi piri' mi'. Tivi'nanyi.

Nemi nebulya' nayaa diraginna limwaga'daa diraginna daavina yaade'nesi.

¹⁹Yuya sarevidaa'nyi, nya'mweihi, Jizaazare tawe neminyinevi Gotiyaryabanna gamire Ku'dika Tewaanya Nebulya'nanyavi nemi diraginna da'daanyaina yiniga wi'na wilaanneine. ²⁰Yi daresi. Nemi wilaanne dazaryabanne tuta diraginnaka mudike' Jizaazai gami sai baasa'. Yi tuta daza' gami sahwai gaalyavi aaya kaavilyalyi. Sahwai nemi wilya'neinaavina janne naange' kaadihisa'bisa' timunadaa'disiyavi wilakelyi. Yi nabaai janne daza' gamire kilaakejiki. A'mwera Ku'dika Tewaanya Nebulya'nanyavi wilya'neraavi janne naange' tihini'nike' baasakabaabi' gamire kilaakeji' mubithika yirasa'neji' kayaaka yigaina'. ²¹Nemi Gotiyare angeviyainaavi gamireinaavi nemaremwaaideina Yira'de Naangei munyawinyai kininnakeine. ²²Daza nebwinawarikevi nemi yuya kwaasiya marasi'nadaa simunya nebulya'nanya' kininnakeina yi nemi Gotiyari nayaa diraginna nebulya'na limwaga'daa yi sahwaryabanna nayaa gaimakunna

wawaana! Jizaazai gamire tawejji' nemire simunyi yuya yiwetawakya yibwakinikeri yiwaipiwagasi'nya'na yirikuraka nemire kilaakeji' aalya nawi'nyaangesi aalya neya'naji neyakeina. Yi sareina Gotiyari wija'na sara wawaana! ²³Nemi yuya tewaanya yemwaidaanyabwi ku'maayaba jalikurakya' diraginna limwagaraana! Nemi lika sangina myaanna! Sa' nemi nayaa pada'galalimwagaraana! Sare' darevinyi. Yuya yune naanga nebulya'na Gotiyai mena dinikengi ya'nenna sai yadelyi. ²⁴Nemi nemire neya'mwe kwaraavinaji simunya nayaa yawiraana! Yi simunya yawisa'na saraavi yidikaasa' pwaraavina wivu'nade'naji wawinya nawi'nya wigaimwabi'de'naji sara yaana! ²⁵A'mwe pwara yadivitabaabi' neya'mweraji Gotiyari yilaaya ya'na kwaiyi'bwa'nya sabwi myagalya'mavaanna! Aawa. Neyamweraji simunya yiwange'na diha'bwa'naana! “Yirika aayari' mena nebawa mika!” yawiranganawaaji sarevi yi nemi wawinya sa' diraginna nayaa yaana!

²⁶Sare' darevinyi. Nemi yagaala nebulya'nanya Naangerevi mena yawiramaarona yi divi yune nennya saburi nemi kayaa'nanyaburi yamaryadaanya'na kayaa'nanya daza' marasi'nya'ne yira'divisa' aane piri' kuna mwari'. ²⁷Aawa. Sara yipijaraavi yune yawibwasa' lika yiri'galya'ne' yemwaaibi'dera mwaabi'de'nanyi. Yi wana dikange'na na'nade' kayaaka yigaidevaabi' yi Gotiyai sahwaravi gamire yikamaangera sara yima'nipijaraavi yigalade'nanyi. ²⁸A'mwe pwai kwai Mozizare kiwinya' midinya'na “Arikewi!” yawiralimwanna yajai, yi a'mwe pwaraaina a'mwe kwaraai kwainanyara gamire yiwetawakyabwi tinna wanganeva sara jalikurakipija'na a'mwe naangera a'mwe dazarina kale mwiannera tamakadivisalyi. ²⁹Yi sarimi a'mwe Gotiyare Gawaalivaangeri bule'na wijaavajarina gara yawi'mwaava? A'mwe dazai yi taanga naanga Mozizarevi pari'mavajare tivikisa wawilavike maaradei midaaka! Yi dazai yagaala diraginya' Gotiyai nemiji nelimwagarikevine tawe' sahwaru tewaanyari wimwaaihya'ne' kiri' sahwai “Yaasiwa'nanyasi,” yawirakelyi. Yi sai kale gaimwange'ne Kuryari biraizike' wana kayaa'nanya nebulya'nanyabwi yakelyi. Yi sahwarina be tivikita' maaradelaka! ³⁰Sare' darevinyi. Nemi Gotiyai dakerina mena yawi'manigo. Dara dinikesi. Kayaa'nanyaburi tivikisabwi yi sa' wawinya' nimirisi. Nimi sainyi kayaa'nanya' tivikirideinyi. Nabaai sai yagaala piri' da’ “Yune Naangeinyi ninnya a'mweraavi maryawibwariderera.” ³¹Nabaai Gotiyai gaalyavi aaya kaavilyai neminyi kayaa'nanyanna nerivikiryanevi gamire asiri galalimwagata neyaja' yi sa' wana lika neyiri'galade' naangaangesi.

³²Sare kiri' sariminyine sinnawi sagaa'na simunya ayina nayaa jawirila! Yi Gotiyare baake' sarimire simunyavi yihwannakegaa' yi dazagaa' Kiraazitiyari limwagesa'na daanga kwalaalya maareva sahwari myagalya'mayeva kuna diraginna daaya'neihi yagiyagi wawinya naange' yesaihilyi. ³³Yi piri' daresi. Pigasa a'mwera sariminyi

a'mwe yuyaraavire tinnyari marayihidaakwadivisare. Yi sahvara navaruyagaalya yihithadivisare. Yi taanginya yihizaavadivisare. Nabaai piri' daresi. Pigasa sarimi sirya'mwe taanginya sara maa'divisaraji avaaina ye'mwannamwaala yadivi' sarimi gaimwanga yadiviki. ³⁴Sare' darevinyi. Kiraazitiyari limwagesa'na kalavuzangevi mwaaidivisaraavina kale yihyadaa'nyi gaimwagya'neihi sahvaraavire taanginyangi sahwaraji ye'mwannamwaalesaihilyi. Nabaai “Nemire nebulya'nanya Gotiyai yune naanga nebulya'na wija kuna wari'. Nabaai sa yuyagaa' waradengi,” mena yawireva a'mwera Kiraazitiyareihire gilyivita yhipalamaareta kiri' sarimi yilaaya yina yadivi' yi wanganakina yesaihilyi.

³⁵Sarevidaa'nyi sarimire diraginna limwanga diraginaanga dazaburi kuna daa'divi' myagalya'mapina! Aawa. Sa' yi gannya tivikita naange' kininnakesi. ³⁶Sare' darevinyi. Gotiyare simunya' midinapiji sahwai sinnawi yune naanga nebulya'na yihithake' maarya'neihi kwaamu'nanyaburi diraginna nayaa dithaayidevwina dimaaryila! ³⁷Sare' darevinyi. Gotiyare bukuyavi dara dinikesi.

Maalikegaa'na, nebawana mi'.

Dazai nebwinawalaabathelyi.

Sai yemwaala yadei mi'.

³⁸Nimire yida' maraangei nyilimwaga'devi mwaaladelyi.

Kiri' sai lika sangina yaja'

Sarina nimire Kuryai yilaaya nyigaladei mi'.

³⁹Kiri' sarimiji saina a'mwe lika sangina myadaa Gotiyari maginyirayadaa yiwiya yadaanyaina mi'. Aawa. Nemi a'mwe diraginna limwadaa gaalyabwi ma'daanyaine nemi.

Sinnawinyara Gotiyari diraginna limwagesa' nejiwaainivanike'nesi.

11 ¹Diraginna limwangebwi yi sabwi darebulyi. Nemire simunyavi diraginna mena limwagaraaja' yi sa' yuya nemi yemwaaimanigonna Gotiyai nejaaya'nenne aaya kaavilyasi. Yi daza nemire tinnyai tinna mwanganyivanigo sa yi nemire simunya' limwangebwi nebulya'na yawirangamani!. ²Sare' darevinyi. A'mwe sinnawinyara sahvara diraginna kalimwage', sare' yi Gotiyai da' “Sahwara yi nawi'nyarera.” ³Nemi diraginna limwadaa sarevi yi nemi mena yawiramaa'manigo. Gotiyai yagaalya' wijaakevi sigunyasi Kwaakesi yavikaryaa'. Yuya nemi tinna wangamanigo sanna Gotiyai piningi tinna yiniga wi'na mwanganyi yaannengi maaraka yuya sa yavikaryaakengi.

⁴Aiveli Gotiyari diraginna limwaga'delyi. Sara yada yi sahwarina yirata tewaanya' wijayaa'. Yi yirata daza' gathaakaangei Kenimire yirasavi wawilavikesi. Yi tewaanya nebulyasi. Yo, Aiveli diraginna limwagaka dazavina Gotiyai “A'mwe yida'maraangeiginyira,”

wijalikurakakelyi. Gotiyarina yanga Aiveli wijayaakenna Gotiyai nawi'nya wivu'nakelyi. Yi Aiveli mena kabala' kiri' gamire diraginna limwanga dazavi sa' yagaala kuna divanikesi.

⁵Yinoki Gotiyari diraginna limwaga'delyi. Yi Gotiyai sahwarina daka “Mabalanna!” sahvari maaraka Sigunyavina makilaawa'. Gotiyai mena maarake'na a'mwera sahwarina biramaarya'nera yeva kiri' mwanganyi ye'. Sare' darevinyi. Yi sinnawi Gotiyai Yinokimi mamaaryadi'nyi yi dazagaa'na Gotiyare Bukuyavi dara dinikesi. Yinoki Gotiyari yilaaya naanga wigalakelyireva. ⁶A'mwei Gotiyari malimwagya sai Gotiyari yilaaya wigalannei mi'. Sare' darevinyi. A'mwe pwai Gotiyari yilaaya ya'nei sahwarayaba gaimakuwilya'nei yi sahwai dara yawirana! Yi Gotiyai mwaali'. Sahwai a'mwera sahwarina bi'divisaraavi tivikita nawi'nya' wijaavadelyi. Sara yawirana!

⁷Nowaai Gotiyari diraginna limwaga'delyi. Sara yada yi Gotiyai yune'na widakevi “Mala nayaa jiwannana!” sahwai divi yima'nadevina kuna mwanganyada Gotiyare yagaalya' kadika wi'namaa'na yaka sipiya piri' yavikarina ya'. Sarevi yi gamiji gamire a'mwakaimiraayamilikaji sipiyavi kusawi yikwina yeva wilamwaaina yesa'na nawi'nya yivainakenidake. Gannya diraginna limwanga dazavi Nowaai Kwaakevakiya a'mwe yuya pwaraavi kotiya mena jidavakesi. Sahwai Gotiyari limwaga'daa'nyi pwara aawa. Yi gamire diraginna limwangevi Gotiyai Nowaari “A'mwe yida'maraangeiginyi. Yi nimore kaimiraayaigi yima'niwaa,” wida'. Yi Gotiyai a'mwe yuyara gaminyi diraginna limwadivisaraavi yadevaabisasi.

⁸Eviraami Gotiyari diraginna limwaga'delyi. Yi Gotiyai jaka wijiwaramaa'na kya' Eviraami Gotiyare yagaalya' midinna yakelyi. Sai gannya angeba yagalya'mavaka yi kwaaka pibanna Gotiyai gannya yinahunya' wijaaya'nebanna wawa'. Eviraami myawirya' “Nimi gawinna wideinyaka?” Kiri' sai diraginna limwada wawa'. ⁹Sai diraginna limwada kwaaka dazavi sinnawi Gotiyai sari yune naanga nebulya'na “Gizaavidesira,” daka savi mwalaawa'. Yi sai kwaaka saviyaibi' kwaaka dazavi maaveibi' mwaala'. Sai seli anga siminangebisangi Aazaki gawaalivaangelyi Jaikopi gyakwalaangelyi mwaalagilabaabi' mwaaidelyi. Yi a'mwe dazaraai kwaaka daza' sinnawi Gotiyai dakabaabi' sali yagaala yune naanga wija sa' ye'mwannamaaragilyaraalyi. ¹⁰Sare' darevinyi. Anga naange' Gotiyai gave sahwaina anga naangeba majavwina yawiramaa'na yaka gami sai mada'. Yi anga naanga daza' yuyagaa'ne' mannigunikesi. Eviraami anga naanga dazaba kusawi wilya'ne gannya saggaa'na yemwaala yakelyi. ¹¹Nabaai Seraan' Gotiyari diraginna limwaga'devi gami sa' yaginya' mwaaida kiri' nabaai a'mwe ne' mena mwaaida kiri' kaimiraayarina munya wannya'ne diraginya' wi'na maarakesi. Seraan' simunya dara yawiramaarakevinyi “Yi Gotiyai

yagaala yuna nebulya'na dadelyi. Sahwai limwangebwi yinikelyi. Sahwai nimi kaimiraayarina munya wannya'ne'nyi mena nyidakiwake' yiniga wi'na yadelyi.”¹² Sarevi yi a'mwe gave dazai nabaai sai yuna nei balya'neba kibawa yada sai gyakwalaanga kwalaalya naangeraavina kwiyakwalaangei yima'nakei. Nabaai sahvara silingaamina sigunyavi yilarika sabi', saalaalyavi maangebaari siweka warika sabi' kwalaalya naanga yima'niguvaniga'. A'mwera ata yiniga wi'na gibinera mi' sahwaravaavi.

¹³Yuya dazara kuna diraginna limwadi'ni mena bale'. Sahvara Kwaakevaki mwaalesagaa' nawi'nya daza sinnawi Gotiyai sahwaravaavi yune naanga nebulya'na dake maaretara mi'. Aawa. Sahvara nawi'nya daza menya saaminnyaba kuna daa'divi' sahini tinna wangadivi' yilaaya ye!. Yi ku'maayaba dara jalikurake! “Nemi Kwaaka dathavaki mwaaihoina a'mwe anga piwidaasarabisaine. Nemi angavaayaina maalikegaa' Kwaaka dathavaki bamwaaiho.”¹⁴ Sare' darevinyi. A'mwera yagaala sasare sa' dadivisara dara neyibwaridaakwe' “Nennya kwaaka Gotiyai nenimaangei mwaaideva nebulya'na biramaraana!”¹⁵ Piri' daresi. Anga dazaba sinnawi yagalya'maveva besaba kumire simunyavi kuna waraji kwaji sahvara ayina wiya'nera yi tusa' kininnakera kamwaaibithika!¹⁶ Piri' daresi. Kumire simunyavi kwaaka pibanna yi sa' kumire abwaiwalaasavi wawilavaka yi tewaanya nawi'nyaangevina tewaanya wivu'nakesi. Sa' yi yune Sigunyabanna. Sarevi a'mwe dazarera dara desa'na “Gimi nemire Gotiyaiginyi,” Gotiyari yilaaya wigaidivisalyi. Gotiyari sahwaravaavi wagila muvwa'nyakelyi. Sare' darevinyi. Sai anga naanga piba a'mwe diraginna limwaga'divita dazara mwaabi'deva mena yovirawakakere.

¹⁷Sinnawi Gotiyai Eviraamimi yaamiji yijiwaalakegaa' sara kuda' yi Eviraami Gotiyari diraginna limwaga'da “Ninnya Aazakimi tamiraya'neri Gotiyarina wijaavima!” dakelyi. Gotiyai sahvari yune naanga nebulya'na widakei sahwai kaimiraaya gave pwainanya dazari tamirasa'nei sara daka yakelyi.¹⁸ Yi kaimiraaya dazai Aazakimina Gotiyai Eviraamimi wida' “Yita yune Aazakimire savaa'na gimire yita savaa' yaya maapi'dere.”¹⁹ Eviraami dara yawiraka “Nyibwaali' mena kabaloji baa'nana! Gotiyai ayahi yiniga wi'na yidikaavannelyi.” Sarevidaa'nyi ke'ba'na yagaalya' daza'na sasare' nemi yiniga daanneine “Eviraami gannya kaimiraayari ayahi maara' kavi'ninnyavidaasaabisari.”²⁰ Aazaki Gotiyari diraginna limwaga'delyi. Sara yadevi sahwai Jaikopiji Yizolyi saraari yagaala tewaanya naanga yanga ya'ne' widakelyi. Yi yagaala dazavi sahwai sahwaravaavi dividaa'nyi yima'nya'nenna dakelyi.²¹ Jaikopi Gotiyari diraginna limwaga'delyi. Sara yadevi yi gami balya'ne kibawegaa' Jozepiyare a'mwakaimiraayaraarina Gotiyai tewaanya naanga yanga yima'naabya'ne yagaala wida'. Yi sai yadisarik

yademavemwaaina yaka Gotiyari yilaaya yakelyi. ²² Jozepiyai Gotiyari diraginna limwaga'delyi. Sara yadevi yi yirika gami balya ya'negaa'ne yagaala daka!. Yi divina Yizireliyara Yizipi yagalya'mavapiri wipi'dehaa! gamire yaginyari! kwaaka Gotiyai wijaavadevina makabapi likirakya'na sahwarraavi wida!.

²³ Mozizare ganimaangeyoi Gotiyari diraginna limwaga'disawaalyi. Sara yadisavi ganaange! Mozizari mudanga kya' yi sawaai kaimiraaya tewaanya nawi'nyari wanganna yagilya'naji kingiyare yagaala dakinike'na sawaai lika myagilya'naji lawe dikaai di'nannela dahila sahvari lika yulyakina yagilyawaalyi. ²⁴ Mozizai Gotiyari diraginna limwaga'delyi. Sara yadevi dividaa'nyi sai naanga mena yima'naka "Aala!" da'. " 'Sahwai Yizipi maremwaaidei Peroyare garaavaanga savirelyira,' nanyidipika! Peroyare diraginya' maarya'neinyi mika! 'Aala!' diwa." Sara dakelyi. ²⁵ Gami sai "Gotiyareraji taange' ye'mwannamaarima!" daka kayaa'nanya savire sabwi midinya'ne maalikegaa'ne wabahilaaka biramaarya'na "Aala! Sara yiwija' naangegaa' savire wagila nanyivwa'nadika!" da'. ²⁶ Sai sara yawiraka nabaai sai Kiraazitiyari birala widipi'devaabi' wagila maarya'ne' daza' yi gilyivita nigwilalaaka Yizipi mwaalyaraavirengi nebulya'na wavila'desi. Sare' darevinyi. Yi Gotiyai sahvari wijaaya'ne tivikita nawi'nya' yuyagaa'ne' yawiranganake'nanyi. ²⁷ Gotiyari diraginna limwaga'devi yi sai dikaavaka Yizipi yagalya'mava!. Sai kingiya dazare sinna tika widavake'na lika myaka yagalya'mava!. Sare' darevinyi. A'mweina Gotiyari tinnyalyi wangadaanyaina mi!. Kiri! Mozizai Gotiyari tinna wanganya'bi' yakevina sai diraginna mwaalakelyi. ²⁸ Gotiyari diraginna limwaga'devi Pari'ma'munne' yimavidaakwa!. Ejeliya tamakadei Yizireliyainaavire siraangeraayaba gidikusabanna nabathikaji, Mozizare yagaala midineva sipizipiyare tawe' kaadihisavi yirikuresa'nanyi. ²⁹ Yizireliyara Gotiyari diraginna limwadivisavi yi Saalaalya Wayaakevi kwaaka yaalikiryavaki wilaawe!. Nabaai Yizipiyara sahirivi yaamiji sara yesa' yi aalya' maramina kwia' mena balina ye!. ³⁰ Yizireliyara Gotiyari diraginna limwadivisavi sikurika Jerikonyavi yirika ata puridaa'nyi pwaraalya gazarisari' wawilavakegaa' kaanya gi'mave!. Yi sara kye' sikurike' wala'na yakesi. ³¹ Rayaa' sinnawi yaasiwa' yamaryade! Gotiyari diraginna limwaga'devi a'mwe pwaraari gaimwaga!. Saraai Yizireliyaraavine dameraai angeba Jerikona badi! kutinna byadaakilyiyaraari. Sarevi yi sa' a'mwe Gotiyari galazekivalesaraji kayaaka mye'mwannayinya!.

³² Kiri! dahaa' nimi ayahi be yagaala je'mwagijiwana? Aawa. Dahaa' yinigejaa' mi!. Sare' darevinyi. Nimi yagaaikiwinya diwine' Githiyoninna, yi Baraakinaji yi Saamizoniminaji yi Jepitaazarinaji yi Devitiji Saamyiweliji saraarinaji yi Gotiyari

wi'nawijiwaakadivisaraavinaji. ³³A'mwe dazara Gotiyari diraginna limwaga'divisare. Sarevidaa'nyi yi pwara malyavi wavila'divi' kingiya pwaraavire kwalaalyaraavi aamiyaraavi walamarakadivisare. Pwara tewaanya yida'maraangebwinna yadivisare. Pwara Gotiyai yune naanga nebulya'na dake maaresare. Pwara kavijilika laayoniyaraavire maangengi galabu'mwanna ye'. ³⁴Pwara dika naange' kyida' yigaapalesare. Pwara likaanya wodivi' kwaari'masiraminya maramakya'. Pwara arakijara mwaaleva yi dividaa'nyi diraginya maare'. Pwara malyavi a'mwe diraginaangera nebulya'na yima'ne'. Yi sahvara menyaraavire aawilata naangeraavi mijamakwawe'. ³⁵A'mwe Gotiyari diraginna limwaga'divisangi. Kumire mena bainikera ayina kidikaava' sahini ayina maare'. Kiri' a'mwe pwara kalavuzavi mwaaidapi yikamaangera kumire kilaakeji' kayaaka nebulya'na yigalake' kumire yune balya'negaa'na. Sahvara Gotiyari bule'na wijaavipiji kwaji yi nabaai yikamaangera sahvaraavi makwaasina kyipidika! Kwipidika! Kiri' sahvara yikamaangeraavire yagaalya' midinetara mi'. Aawa. Sahvara yawi'divi' "Kavi'ninnyavi Gotiyai neyidikaavadeinera. Yi gaala nawi'nyaange' yuyagaa'ne' maraadeinera," diraginyara bale'. ³⁶Pwara taanga maarina ye'. Yikamaangera sahvaraavi yagaabiraizika wiadaapi, mala dika wigida'divi' seniyabaraji wila galyirakadivi' yi kalavuzavi wimwaaihina yadivisare. ³⁷Yikamaangera pwaraavi silyaji liwakina. Pwaraavi kisikisilyasi yune woripu'na. Pwaraavi kwaari'masiraminyasi dabaina kye' bale'. Pwaraavire kilaakejikine yuya sanna wimudaasakera kilaaka sipizipiyangireji memeyangireji kumire kwaabihannya yira'ne'. Yeva kaanya yamarye'. Pwaraavi taanga wijaavesare. Pwaraavi wana kayaa'nanya wiadivisare. ³⁸Sarevi yi kaanya yiwinama'na kwaakevi a'mwera maayabaji mugunyangiji lika yulya'na yadiviki. Yi silyangiya linnyangiji yi kwaakevi yirorilyangiji wilamwaaale'. Sarera tewaanyarera. A'mwe diraginna limwaga'divita dazara sahvaraavi tinnyawi mwaalya'nera a'mwe Kwaakevakiyara yiniga wi'na yipinera mi'.

³⁹A'mwe yuya dazara Gotiyari diraginna limwaga'divisaraavina Gotiyai da' "Sahvara yi nawi'nyarera." Kiri' nawi'nya daza' sinnawi Gotiyai yune naanga nebulya'na dake maaretara mi'. ⁴⁰Sare' dare'nanyi. Gotiyai yawita piri' yawita sinnawinyavi wawilavike' neminyine' yovirawaka'. Sinnawinyara yibwaramakwaanya' neminyi ya'nera yiniga wi'na waanya'nera mi'. Aawa. Nemi sahwaraji yuyagaa'ne yune nebulya'nanyainaavi nebulya'na yavada'galanemwaaahadeinera.

**Nemi Jizaazari nayaa yawirangadaa sahwari
diraginna limwagaraade'nesi.**

12 ¹Dathazarevidaa'nyi dara yaana! A'mwe sinnawinya dazara gihipaledaaveva neminyawi yiraayanga naange'bisara diraginna

limwagasabwi neyibwaridaakwe' neminyi. Yi yuya taanginaanga gazasasi yuya kayaa'nanya nemiwi'nika gazasasi nemi nayaa yagalya'mavaana! Yi nemire simunya' nayaa diraginya yivaimwadaa Gotiyai nemi kaanyave'na ya'ne' dahilakake' gavamarasi'nyikaanya daza' kaanyave'na diraginna yaana! ²Sara yadaa nemire tinnyai nayaa banganaraa Jizaazari! Sai nemire diraginna limwangevi aaya kaavilyai yi divi nabaai sai limwanga savi yunebanna nebulya'na yadelyi. Sahwai yilaaya' dahilakinike' divi maarya'ne'na simunya yawi'da diraginya mwaalaka yisaviri tamarimwesavine daange' maaraka balakelyi. A'mwera yita yovihirarannikevi balya'na wagila naanga wivwa'nade' kiri' sahwai “Gesira,” yawiraka balya savi yakelyi. Sarei dahaa' naangeba Gotiyare maremwaidere namwaa'yisavi aangasimagi mwaali'. ³Sare' darevinyi. A'mwe kayaa'nanyabwi yadivisara yikamaanga kayaa'na yesare Jizaazari. Kiri' sai kuna diraginna mwaala'. Sasare'na nayaa jawirila! Sarimire kuryaraavi maa'na nayihinadika! Sarimire simunyavi maalika nayihima'nadika! ⁴A'mwera sarimire limwangebwi walamarakya'na kayaa'na yihyadivi' mala tannadivitabaabi' sarimi diraginna mwaaiha'. Kiri' dahaa' dazavi sarimire tawe' mwalaabi yiwa'. Mabalyi yiwaa'. ⁵Yagaala Gotiyai sarimire simunyavi diraginya yivaimwange'na yihithake' ganimaangei gawaalivaangeraavi widakabaabisa' navika mena dahayivaniga'! Dara dinikesi.

Nyibwaali', Naangei giminyi yavada'gala ya'ne'na
Pibura gyaza' daza'na “Yaasiwa'nanyasira,” myawi'dinna!
Taanginya gizaavaja' gimire simunyavi maalika magima'nanna!

⁶Sare' darevinyi. Naangei a'mwe pwarina kuvu'noji
Yi nabaai sai gamire sabwi yavada'gaidelyi.
Sai gawaalivaanga gazarizari “Nimireiginyi,” widamaaroji
Nabaai sai yisari' kirisi dika li'bwaradelyi.

⁷Gotiyai yihyavada'galya'neihi nayaa diraginya mwaaidivi'
divaihanaryila! Gotiyai sariminyi yihyaja sabwi yi gamire
gawaalivaangeihirinyi. Sare' darevinyi. Kaimiraayai mwaaidi'nyi
gannya ganimaangei nayaa myavada'galyadei bewalaka! ⁸Aawa. Yuya
kuvinimaanga nawi'nya sara kunnya kaimiraaya yuyaraavi nayaa
yavada'gaidivisare. Nabaai Nimwai gamire kaimiraaya yuya pwaraavi
yavada'gaide kiri' sariminyi yavada'gala mayihyaja' yi gamire kaimiraaya
nebulya'nanyaihi mi'. Sarimi yaasiwa' sigipwakisamili'bisaihilyi. ⁹Sarimi
daza' kiri'naji nayaa jawirila! Nennya nenimaanga Kwaakevakiyara
sahwara nayaa yavada'gala neyadiviki. Yi nemi kuminne yaya
munyaba makidaanyi. Yi dare' yune naanga wawilavike' midaaka!
Nemi kuryaraavi Ganimaangeri kwaaka dalaangewi nayaa kuna
wila'naraana! Yi nemi gaalya' maraadeine. ¹⁰Sare' darevinyi. Nennya
nenimaanga Kwaakevakiyara kumire yinige saburina nemire sabwina

yune maalikagea'na neyavada'gaidiviki. Kiri' Gotiyai sai neminyi neyavada'gaide' yi neminyi nebulya'na negaimwagya'nesi. Yi nemi gamire nawi'nya tewaanaanga sabwi maraade'nanyi. Yi gamibi' yima'naade'nanyi. ¹¹ Piri' daresi. Nimwai neminyi yavada'gala neya'nei taanginya nejaavanike' yi dazagaa' nemi yilaaya myadaanyi. Aawa. Nemire simunya' yune taange'na yibwakidaanyi. Piri' daresi. Sai neminyi mena neyavada'galoji yi divi nawi'nya tewaanya dara yima'nadengi. Nemi tewaanya yida'maraangebulyiyaina yima'nadaanyaine. Yi nemire simunya' kwaamu'na waradesi.

¹² Sarevidaa'nyi yi nabaai sarimire asira diraginya maaya sira yaasiwa' timunadaa'na nyadika! Sarimi wirilya yaginya nayaa widi'divi' Gotiyare wawinya kuna jila! Yi nabaai kwannya' mena barya'bi' warika kiri' diraginna nayaa dithaayila! ¹³ Sarimi kaanya sarimire sivilyaji nayaa yida'na jamarila! Sivila pimagini kayaa'nanyi yirota yunebanna yuya yakabaaibi' sariminyidaa'nya diraginya maayai Gotiyari nyagalya'mavadika! Aawa. Sai yi tewaanya ayina nawi'nya yavada'galayima'nade'nanyi. ¹⁴ Sarimi a'mwe yuya kwaraaviji munyi' kwaamu'nanya saburi midinya'na jila! Nawi'nyabwi girikita'nanya maayaburi dimidinyila! A'mwei nawi'nya sabwi maayai yi sai Naangeri wanganadei mi'. ¹⁵ Sarimi nayaa divada'galemwaalyila! Neya'mwe pwai walaraawoji Gotiyare yanga gaimwanga sabwi nyagalya'mavadika! Nabaai kayaa'nanya neya'mwe pwai sariminyidaa'nyare simunyavi yima'naabozi kayaa'nanya sa yi sai yisari yisila yirika yade yi'nadevaabi' nyadika! Yi sarevi sariminyi taanga yihizaavaja' yi sariminyi Gotiyare tinnyari girikita'nanya nayihyadi! ¹⁶ Yi Yizoi yaasiwa' pinamaryabwi midida sai yakabaaibi' sarimijiya pwai Gotiyari bule'na nujaavadi! Yizoi siraangei mwaalaka kiri' wapaaya yune gave pigaa'na yaasa'ne' siraangerebwina yakabaaibi' Gotiyarebadaa'nyabwi wasi'nakelyi. ¹⁷ Sare' darevinyi. Sarimi mena yawi'maniga'. Dividaa'nyi sai "Diraginya dazabwi ayina maarima!" daka yake, kiri' Gotiyai da' "Aawana." Yizoi sai diraginya' maarya'na kinna kwalaalya da'. Kiri' simunya ayina yawiramaarya'ne' gaminne tusa' piri' mi'. Aawa. Sare'na mala nayaa jiwannyila! Kiraazitiyari kuna diraginna dilimwagarila!

¹⁸ Sare' darevinyi. Gotiyaryawinna sarimi bi'ma'manigasagaa' Yizireliyara yetabaabi' mivaniga'. Yi sawara Mugunya Saainaaya a'mwera asa' yiniga wi'na dathiwanga yipinevi nabaai mugunya dika naangeyaba bi'mave'. Yi sagaa' wana sawisasi wana jihinyaanga nebulya'nanyasi jinnadaa'nyi yi yihuta gwavaaigwavaalya' yadaa'nyi ¹⁹ yi Gotiyare gware' naangave'na maku'na, yi Gotiyare maangwiraaya' yagaalyangi widake wi'nyina. Yagaala sa kadika wi'neva lika naanga yeva Mozizari diraginna dara wide' "Yagaala dazanna nemi kadika ayahi mu'naannera! Nabalaadika!" ²⁰ Sare' darevinyi. Gotiyai yagaala

sa' dara daka' "A'mwe pwai asa' wakoji mugunya dazavi ata limwagaza' sila nayaa diliwakyila! Nabaai bulimakaawoya pwai sipizipiya kwai jaja' avaala sasaresi." Yi yagaala daza' sahwaru lika naanga nebulya'na ye'.
²¹ Nabaai Mozizai kwalyi yuya daza tinna wanganaka da' "We! Nimi lika naanga yadi bi'bita kayaa'na yiwaainiwa." Dazagaa' sahwaru sara ye'.
²² Sarimi sasarengi mi'mayivaniga'. Aawa. Sarimi Sigunyaviyangina mena yi'ma'mwaa'. Yi Mugunya Saayoni, yi Gotiyai gaalyavi aaya kaavilyare anga naange' mannikewi Jeruzaalemi Sigunyavi warikebanna, yi ejelijara taawizaniya kwalaalyara yi'bwa'neva yilaaya yemwaaahasabanna mena yi'ma'mwaa'.
²³ Yi kwaiyi'bwa'nyavi Kiraazitiyare kusilaanyavi, Gotiyare kaimiraayara siraangeraavirevi Gotiyai kuminne yaya' mena yida'nike' Sigunyavi warikeviyaraayawinna yi'ma'mwaa'. Yi Gotiyaryabanna a'mwe yuyaraavire maryawibwarya'neryabanna yi'ma'mwaa'. Yi Gotiyarera yida'maraangebwi yadivi' balesaraavire kuryaraavi yuyagaa'ne yune nebulya'nanyaraavi mena yavada'galawimwaaiahakeraayawinna yi'ma'mwaa'.
²⁴ Yi Jizaazaryabanna sai yagaala nelimwagarika mudikevi yiwagya'nei a'mweraaviji Gotiyariji marirakurakeryabanna yi'ma'mwaa'. Yi gamire tawevi a'mwera sari tamakesa' tawe sa' yiriku'nikeyabanna yi'ma'mwaa'. Tawe daza' yagaala nawi'nya dakesi. Sa' sinnawi Aivelimire tawe' dakabaabi' avainanya'na mi'. Aawa. Sa' Aivelimire tawe' wawilavaka yi nawi'nyaange' dakesi.

²⁵ Sarimi nayaa javada'gainyila! A'mwe dazai dahaa' divanikeri sarimire kadike tila'narapi gamire yagaalyavina "Aala!" nadipika! Sare' darevinyi. Kigaakuna Mozizaregaa' Kwaaka dathavaki a'mweraavi yagaala diraginya' wijaavakelyi. Kiri' gamire yagaalya' galazekivala yesare. Nabaai sahwaru likaanya yiniga wi'na wawetara mi'. Yi kumire wagilyavi tivikita yuna maare'. Dahaa' pwai Sigunyavi mwaalaka yi yagaala diraginaange' nejaavani'. Nabaai nemi gaminyi bule'na wijavaaja' nemi wagilyavire tivikisavi likaanya wawaaji yiniga wawilavaanneina dingaka! Aawa nebulyasi.
²⁶ Sinnawi Mugunya Saainaaya Gotiyare maangi' kada' yi kwaake' wininya yakesi. Kiri' dahaa' sai neminyi yune naanga nebulya'na nediwa' "Yi nimi Kwaakevi ayahi pigaasi tivipalideinyi. Yi nabaai yune Kwaake'nanya'na mi'. Aawa. Yi nimi Kwaakesi sigunyasi sawaari tivipalideinyi."
²⁷ Yagaala daza' "Ayahi pigaasi," neminyi dara neyibwaridaakuvani' "Yuya sinnawi Gotiyai yavikaryaake yi dahaa' sai tivipalasi'nadengi. Yi daza sai marasi'nadengi. Yi ayahi pini warade mi'. 'Yuya Sigunyaviya sa marivipalasi'nyi yiwine yi sa warana!' dozi tivipalasi'nadengi."
²⁸ Sarevidaa'nyi nemi ma'daanya nemaremwaalde' daza' marivipalasi'nyi yannevina nemi nayaa suya suya widaana! Yi yanga gaimwanga daza' limwadaa yi Gotiyari wigalya'neina gaminyi yilaaya nayaa maryaana! Gaminne yaya' munyaba nayaa makidaa yi gaminyina lika yaana! "Sahwai Naangelyi. Diraginaangelyi,"

yawiraana! ²⁹Sare' darevinyi. Nemire Gotiyai widayadaanyai dika naangelyi. Yuya kayaa'nanyaji girikita'nanyaji dazangi dika nasi'na yadelyi.

Aaya neyidikaa'bwarya'ne yagaalyanginesi.

13 ¹Nemi Kiraazitiyari limwadaanyaina daakaji yuyagaa' siryamweraavina kuna yihivu'nana! ²Sarimire angengina badaapiyaraavi gaimwange'na simunya navika myagalya'mapina! Sare' darevinyi. Sinnawi a'mwe pwara sasara yaasara yi sahvara a'mweraavi makabadiwi' kunnya angengi yadivi' saraavi maremwaaina yesare. Kiri' aanga'mwera mi'. Navika mwaaidivi' kiri' Gotiyare mamaayaraavi maremwaaina yesare. ³Sarimi neya'mwe kalavuzavi mwaaihasaraavina simunya nayaa jawirila! Sarimi saihi kalavuzavi saraji ye'mwannamwaaihasaihibi' dihaimwagila! Nabaai neya'mwe kunnya kilaakejikaavi taanginya maa'manigasaraavina simunya nayaa jawirila! Yi sarimi saihi kilaa'nakeihi kumire taanginya ye'mwannamaa'manigasaihibi' nayaa jila!

⁴Kwala maaryabwi yi sa' nawi'nyaangesi. Dazaburi yaya' yuyaihi munyaba nayaa dimakilyila! Sayoishi kwala maaryabwinebwi nayaa jila! Wana nebulya'na tirimaaya' warana! Sare' darevinyi. A'mwera pwaraavire a'mwengi ata limwabizaraaviji a'mwera a'mwe yaasiwa' pinamarya yadivisaraaviji tivikita kayaa'nanya wijaaya'nei jidavadelyi Gotiyai.

⁵Nigwiangi wabarinna ya saburi mamidibina! Gilyivita sarimi limwamanigasa, sa yi nayaa dara jawirila! "Sa yi nawi'nyangira. Sa yiniga wi'na neyadengira." Sare' darevinyi. Gotiyai mena divani! "Yi nimi gimakwaasideinyi mi'. Arikewi. Yi nimi bule'na gizaavideinyi mi'. Arikewi." ⁶Sarevi nemi nennya simunya' diraginya yiwadaa dara daana!

Naangei niminyi nyigaimwadelyi.

Nimi lika miwina!

A'mwera beri' nyipi'deinyaka!

Yiniga wi'na gara nyipineinyaka!

Sara yawi'daa diraginya neyivaimwadeinera.

⁷Sarimire Kiraazitiyarina maremwaaidivisaraavina simunya nayaa jawirila! Sinnawi sahvara sariminyi Gotiyare yagaalya' Kiraazitiyarine' yihiziwaake!. Sahwaraavire kaanya yamaryabulyi balyabulyi simunya nayaa jawirila! Yi sahwaraavire diraginna limwagasabwina dimidinyila! ⁸Jizaazai Kiraazitiyai yi sai kuna avaananyalyi. Yi wonaji yi dahaa' kigaasi yi yuyagaa' yuyagaasi avaina mwaaidelyi. Sahwara sabwi avaananyasi. ⁹Sare'na sarimire simunyangi yagaala dala nabinabinya nabulayihimwagi'nadi! Yi sarimi Gotiyare tusavi nyagalya'mapika! Sare' darevinyi. Nemire simunya' Gotiyare yanga

gaimwangevi diraginya' maarake' sa' yi nawi'nyasi. Nemire simunya' wapaayangire kiwinya nabinabinya diraginya' maarade' mi'. Sasare dazabwi saburi kaanya yamaryadivisaraavi gaimwadevwi mi'. ¹⁰Nemi Jizaazai kwaraanyaba mubithika yira'divisa'bisai kininnakeine. Yi yira'divita sari Juyaraavire yira'divisara Kwaakevakiya Gotiyare Angevi widaayadivisara tika nya'nera diraginya sa' maayarera. Sai balake'na nawi'nyabwi maa'manigo. Sahwara ayabwi kuna yivanigasa'na aawa. ¹¹Sare' darevinyi. Gotiyare Angevi Ku'dika Tewaanya Nebulya'nanyavi Yira'de Naangei tawe bulimakaawoyaresi memeyaresi kayaa'nanya marasi'nya'ne' makwide tawe sawaare kilaaka miwita tika nadivi' mi'. Yi sajikaari angeba mwasilaa makwalyuna kye' dikevi yuna nasi'na'. ¹²Nabaai mwasilaanyavine sarevi Jizaazai kwalyi “Ninnya tawevi a'mwera nawi'nya tewaanya yima'nipika!” daka angabanne kaadihita mwasilaanyavi daange' maarakelyi. ¹³Sasarevidaa'nyi yi nemi kwainaji gaminyawinna angeba mwasilaabi' nayaa wawaana! Yi Juyaraavire ayabwina yadivisaraavirebwi yagalya'ma'na yawaaji sahwaravi wagilya' sai maarakabaaibi' gaminyina nemi wagila sa' nayaa maraana! Sahwari kuna limwaga'daa sahwara yikamaangeraavina diraginna davaana! ¹⁴Mwasilaanyavine sare' darevinyi. Kwaaka dathavaki anga naanga piba yuyagaa' mwaalya'neba maayaine. Aawa. Anga naanga dividaa'nyi yima'naabatheva Sigunyaviya nawi'nyaba nemi biramaraade'nanyi. ¹⁵Sarevidaa'nyi Jizaazai negaimwadevi nemi Gotiyari yilaaya nayaa yaana! Yi yuyagaa' yilaaya daza' yira'divisa'bi' sahvari wijavaana! Yo, daresi. Nemire maangi' sahvari nayaa dara wijavaana! “Gotiyai nawi'nyalyi. Sahvari Jizaazarina nemi diraginna limwaga'manigoine.” ¹⁶Nawi'nya tewaanyabwi a'mweraavi ya'naji sarimire gilyivisa nayaa jaapaidivi' kuneraavi wijaaya'naji sarimi simunya navika myagalya'mapina! Sare' darevinyi. Yira'divisabi' sasare sa'na Gotiyari wigaimani'. ¹⁷Sarimire maremwaaidivisaraavire yagaala nayaa divada'galamidinyila! Yi sahwaravi dalaangevi dula'narila! Sare' darevinyi. Gotiyarina kumire wawinya yuyangi aaya kaavilyavina divi yagaalya' dipi'dera sarimire kuryaraavi maremwaala yihyadiviki. Sara kyapiri yi nabaai sahvara “Nenya wawinyanna yilaaya yadaa sara yaana!” dadivi' limwagapi'dere. Yi saraavi simunya' taanga mwinanna! Sahwara simuyiwaala myipina! Sare' darevinyi. Sariminyi maremwaalya'na taanga winaja' yi daza' sariminyi yihigaimwagathe' mi'. ¹⁸Sarimi negaimwagathe'na Gotiyari nayaa duzila! Sare' darevinyi. Nemi dara yibwakimanigo. Gotiyare tinnyari nemire simunyai yida'maraangelyi. Yi yuyangi nemi nayaa tewaanya yamaryaana! ¹⁹Sarimi Gotiyari wija'na nyigaimwagathe'na yi nimi dara yihithihaa'bwa'manige. “Sariminyawinna yime'nya'bi' ayina bima!” dena yihithivanige.

²⁰Gotiyai kwaamu'nanyaburi aaya kaavilyalyi. Sahwai nemire Naangei Jizaazari bainikeraayawidaa'nyi ayina yidikaavakelyi. Jizaazai gamire sipizipiyainaavi Maremwaala Naangei yima'nya'nei gamire tawe' kabwalaraawa' yagaala nelimwagarikebwi yuyagaa'ne' diraginna dakake'nanyi. Yi sarevi Gotiyai gamire a'mweinaavi tewaanyainaavi tivi'nanyaina yima'nya'neinaavi yakelyi. ²¹Sahwai gamire simunya sabwi yiniga wi'na dimidinyide'na yuya nawi'nya tewaanya gazabwizabwi yihizaavana! Jizaazai Kiraazitiyai negaimwagathevi Gotiyai gami sari wigaimanikebwi nemi yuyainaavire simunyavi marima'naabathelyi. Jizaazai Kiraazitiyai yuyagaa' yuyagaa'ne byaanna diraginya' kininnakei mwaalana! Sahwarine yaya' munyaba makilaana! Sahirisira!

²²Nya'mweihi, nimi sariminyi diraginna yihithihaa'bwa'manige. Yagaala dazavi sarimire simunya' diraginya yiwagya'ne nimi divanigevi sarimire kadikiki nayaa dakyila! Sare' drevinyi. Pikariyikwia daza' nimi sariminyina yida'mwe' yi sa' tu'nanyasi. ²³Sarimi dara jawiranganyila! Nemire neya'mwe Timotiri kalavuzavi mena makwasiwaa'. Nabaai sai niminyawinna yime'nya'bi' bi'mavaja' yi naarimi yuyainai yakwoihilyi yi sariminyi tinna yihwanganaawakadeinaalyi. ²⁴Niminyina sarimire maremwaaidivita yuyaraavi “Nya'mweihi!” duzila! Gotiyare tewaanya yuyaraavi “Nya'mweihi!” duzila! Kwaaka Yitaali mwaalyara Naangerinera “Neya'mweihi!” yihithivaniga!

²⁵Yanga gaimwangebwi sarimi yuyaihilyi yihye'mwannamwaalana!